

四庫全書

經部

欽定四庫全書

禮記大全卷二

明 胡廣等 撰

曲禮第二

凡奉

上聲

者當心提者當帶

疏曰物有宜奉持者有宜提挈者奉者仰手當心提者屈臂當帶深衣之帶也古人常服深衣

執天子之器則上

上聲

衡國君則平衡大夫則綏

讀曰安

之

士則提之

疏曰上高也衡平也平正當心天子器不宜下故臣
為擎奉皆高於心諸侯降於天子故臣為奉持器與
心平大夫降於諸侯故其臣奉器下於心綏下也士
提之則又在綏下

凡執主器執輕如不克執主器操幣圭璧則尚左手行
不舉足車輪曳踵

大夫稱主此則通上下貴賤言之如不克似不能勝

也聘禮曰上介執玉如重尚左手謂左手在上左陽尊也踵脚後也執器而行但起其前而曳引其踵如車輪之運於地故曰車輪曳踵。方氏曰左手不如右強尚左手所以為容下右手所以致力。馬氏曰容則不可觀進退不有禮則不可度古人以一威儀之肅慢為利害之所召一執玉之俯仰為禍福之所係則凡見於奉持操執行止屈伸之末者其可忽哉

立則磬折垂佩主佩倚則臣佩垂主佩垂則臣佩委

僂折如磬之背而玉佩從兩邊懸垂此立容之常然

臣之於君尊卑殊等則當視其高下之節而倍致其恭敬之容可也微俛則倚於身小俛則垂大俛則委

於地皆於佩見其節

馬氏曰玉藻曰足容重手容恭立容德又曰立容辨卑毋緇曲

禮曰立如齊則自奉者當心以至尚左手首手容恭也行不舉足車輪曳踵者足容重也磬折垂佩者立容德而辨卑如辨也

執玉其有藉者則裼錫無藉者則襲

古人之衣近體有袍襪之屬其外有裘夏月則衣葛或裘或葛其上皆有裼衣裼衣上有襲衣襲衣之上

有常著之服則皮弁服及深衣之屬是也掩而不開
謂之襲若開而見出其裼衣則謂之裼也。又聘禮
註云曲禮云執玉其有藉者則裼無藉者則襲所謂
無藉謂圭璋特達不加束帛當執圭璋之時其人則
襲也有藉者謂璧琮加於束帛之上當執璧琮時其
人則裼也曲禮所云專主圭璋特而襲璧琮加束帛
而裼一條言之先儒乃以執圭而垂纁為有藉執圭
而屈纁為無藉此則不然竊詳經文裼襲是一事垂

縲屈縲又別是一事不容混合為一說

國君不名卿老世婦大夫不名世臣姪迷婦士不名家

相去聲長妾

不名不以名呼之也。疏曰上卿貴故曰卿老世婦兩媵也次於夫人而貴於諸妾也世臣父在時老臣也姪是妻之兄女婦是妻之妹從妻來為妾也大夫不世爵此有世臣者子賢襲父爵也家相助知家事者長妾妾之有子者

金華應氏曰所謂故國者非爵木之謂也有世臣之謂也古者

立國必有世家大族以培護其本根且有世臣大老
以隆固其棟幹人君常寵異而尊禮之所以存忠厚
養恭敬也氣脉不墜乎先世典刑可厲乎後來國之
卿老家之世臣士之家相尊卑不同而輔贊則一敬
之而不名所以示夫外之有所統也若夫內助之賢
而舊者如世婦如姪娣如長妾雖其分不敵於女君
其貴實隆於諸御敬之而不名所以示夫內之有所
統也內外皆有所敬而不名則受其所敬者莫不竭
其忠而盡心觀其可敬者莫不知所畏而稟命然後
國政家事有所統一而緩急有所憑藉而倚重矣

君大夫之子不敢自稱曰余小子大夫士之子不敢自
稱曰嗣子某不敢與世子同名

列國之君與天子之大夫其子皆不敢自稱余小子

避嗣天子之稱也列國之大夫與士之子不敢自稱
嗣子某避嗣諸侯之稱也。呂氏曰世子君之適子
也諸臣之子不敢與之同名亦避君也若名之在世
子之前則世子為君亦不避穀梁傳曰衛齊惡衛侯
惡何為君臣同名也君子不奪人名不奪人親之所
名

君使士射不能則辭以疾言曰某有負薪之憂

呂氏曰射者男子之所有事不能可以疾辭不可以

不能辭也負薪賤役士之所親事者疾則不能矣故

曰負薪之憂也

吳郡范氏曰射者男子之事一藝而文武之道備焉其為法也內志欲正

外體欲直容止欲比於禮節度欲比於樂有揖讓之儀有反求諸己之道古人進德修業射蓋其一端也是以人人能之而不能者以為耻故君使之射而偶未習焉則不敢以不能對而以疾辭

侍於君子不顧望而對非禮也

呂氏曰顧望而後對者不敢先他人而言也。應氏

曰有察言觀色之意

君子行禮不求變俗祭祀之禮居喪之服哭泣之位皆

如其國之故謹修其法而審行之

言卿大夫士有徙居他國者行禮之事不可變其故

國之俗皆當謹修其典法而審慎以行之

藍田呂氏曰孔子去

魯曰遲遲吾行也去父母國之道也子路去魯謂顏淵曰何以贈我曰去國則哭於墓而後行古之君子重去父母之國如此則其去也豈得已哉道合則從不可則去君臣之義也故以道去其君者君所以待之者三有禮焉故臣為舊君反服而君未之絕也樂樂其所自生禮不忘其本吾於父母之國夫豈不懷況以道去君君待之有禮則舍故從新仁人君子有所不忍此行禮所以不求變俗也俗者吾父母之國俗也雖去而之他國至於祭祀之禮居喪之服哭泣之位皆如其舊謹修審行而不輕改者不忍忘吾父母之

也國

去國三世爵祿有列於朝出入有詔於國若兄弟宗族
猶存則反告於宗後去國三世爵祿無列於朝出入無
詔於國唯興之日從新國之法

去本國雖已三世而舊君猶仕其族人於朝以承祖
祀此人往來出入他國仍詔告於本國之君其宗族
兄弟猶存則必有宗子凡冠娶妻必告死必赴不忘
親也若去國三世朝無仕宦之列出入與舊君不相

聞其時已久其義已絕可以改其國之故矣然猶必待興起而為卿大夫乃從新國之法厚之至也

馬氏曰人

臣有舊君之服不過齊衰三月而已去國三世出入猶詔於國吉凶猶告於宗後何也舊國者人之所不能忘宗族者人之所不可絕今夫鳥獸之過故鄉猶回翔踟躕而後去狐之將死猶正丘首而後斃況於人乎故太公封於齊世葬於周君子以為不忘其本則去國三世而恩義不斬理固然也蓋爵祿有列於朝則是不棄其後也出入有詔於國則是不絕其好也如此則吾之所以反告者其可已乎夫爵祿有列於朝則有宗後以合其族爵祿無列於朝則無宗後之法無宗後則不特不反告而已故唯興之日從新國之法蓋方其未仕也雖守舊國之法可也及興而仕人則有所隸矣其可復為未仕之所為乎

君子已孤不更

平聲名

名者始生三月之時父所命也父沒而改之孝子所不忍也

已孤暴貴不為

去聲

父作諡

文王雖為西伯不為古公公季作諡周公成文武之德亦不敢加太王王季以諡也。呂氏曰父為士子為天子諸侯則祭以天子諸侯其尸服以士服是可已之祿養其親不敢以已之爵加其親也父之爵

卑不當謚而以已爵當謚而作之是以已爵加其父
欲尊而反卑之非所以敬其親也

居喪未葬讀喪禮既葬讀祭禮喪復常讀樂章居喪不
言樂祭事不言凶公庭不言婦女

復常除服之後也樂章弦歌之詩也。呂氏曰讀是
書非肄業也當是時不知是事不以禮事其親者也
吉凶之事不相干哀樂之情不可以貳故喪凶事也
不言樂祭吉事也不言凶公私之事不可相干私事

不可言於公庭故公庭不言婦女

長樂陳氏曰非喪而讀喪禮則非人

子之情居喪而不讀喪禮不失之過則失之不及未葬而讀祭禮則非孝子之情既葬而不讀祭禮不失之蹟則失之怠喪未除而讀樂章則哀不足喪復常而不讀樂章則樂必崩

振書端書於君前有誅倒筴側龜於君前有誅

人臣以職分內事事君每事當謹之於素文書簿領

已至君前乃始振拂其塵埃而端整之卜筮之官龜

筴其所奉以周旋者於君前而有顛倒反側之狀此

皆不敬其職業而慢上者故皆有罰

嚴陵方氏曰筴有本末故曰倒

龜有背面故曰側側倒筴側龜與振書其過非大然皆有誅疑若己甚蓋以羣臣之衆而奉一人之尊不可不謹也抑所以防其漸歟

龜筴几杖席蓋重

平聲

素衿

軫

絺綌不入公門

龜筴所以問吉凶嫌豫謀也几杖所以優高年嫌自尊也席所以坐卧蓋所以蔽日與雨絺綌所以涼體衿單也單則見體而褻此三者宴安之具也重素衣裳皆素也以非吉服故亦不可以入公門

苞

白表反

屨扱

挿

衽厭

於涉反

冠不入公門

苞讀為薦以薦蒯之草為齊衰喪屨也扱衽以深衣
前衽扱之於帶也蓋親初死時孝子以號踊履踐為
妨故扱之也厭冠喪冠也吉冠有纚有梁喪冠無之
故厭帖然也此皆凶服故不可以入公門

書方衰

催

凶器不以告不入公門

方版也書方者條錄送死物件於方版之上也衰五
服之衰也凶器若棺槨牆翬明器之屬不以告不入
公門謂告則可入者蓋臣妾有死於宮中者君亦許

其殯而成喪然必先告乃得將入也

公事不私議

馬氏曰季孫使冉有訪田賦於仲尼仲尼不對而私於冉有何也季氏用田賦非孔子所能止其私於冉有豈得已哉

君子將營宮室宗廟為先廡庫為次居室為後

君子有位者也宗廟所以奉先故先營之廡以養馬庫以藏物欲其不乏用也故次之居室則安身而已

故又次之

凡家造祭器為先犧賦為次養去聲器為後

犧賦亦以造言者如周官牛人供牛牲之互與盆簋

之類鄭註互若今屠家懸肉格盆以盛血簋受肉籠

也。䟽曰家造謂大夫始造家事也諸侯大夫少牢

此言犧牛也天子之大夫祭祀賦飲邑民供出牲牢

故曰犧賦

藍田呂氏曰宗廟祭器事吾先也廡庫犧賦待吾衆也居室養器奉吾私也此先後

之序也

無田祿者不設祭器有田祿者先為祭服君子雖貧不

粥

育

祭器雖寒不衣

去聲

祭服為宮室不斬於丘木

呂氏曰祭器可假服不可假也丘木所以庇宅兆為宮室而斬之是慢其先而濟吾私也

大夫士去國祭器不踰竟

境

大夫寓祭器於大夫士寓

祭器於士

呂氏曰臣之所以有宗廟祭器以事其先者君之祿也今去位矣乃挈器以行是竊君之祿以辱其先此

祭器所以不踰竟也。寓寄於爵等之同者使之可用也。馬氏曰：微子抱祭器而之周，何也？君子為己不重，為人不輕。抱君之祭器可也，抱己之祭器不可也。

大夫士去國踰竟為壇

善

位鄉

去聲

國而哭，素衣素裳，素

冠徹緣

去聲

鞮

低

屨，素箴

莫反

歷

乘髦馬

不蚤

爪

鬣

翦

不祭

食不說

如字

人以無罪，婦人不當御。三月而復服。

壇位除地而為位也。鄉國向其本國也。徹緣去中衣

之采緣而純素也。鞮屨革屨也。周禮註云：四夷舞者

所扉素箴素白狗皮也箴車覆闌也既夕禮云主人乘惡卓白狗臂是也髦馬不翦剔馬之髦鬣以為飾也蚤治手足爪也鬣剔治鬚髮也祭食食盛饌則祭先代為食之人也不說人以無罪者已雖遭放逐而出不自以無罪解說於人過則稱已也御侍御寢宿也凡此皆為去父母之邦捐親戚去墳墓失祿位亦一家之變故也故以凶喪之禮自處三月為一時天氣小變故必待三月而後復其吉服也

監田呂氏曰
大夫士去國

喪其位也。大夫士喪位，猶諸侯之失國家去其墳墓，
拊其宗廟，無祿以祭，故必以喪禮處也。為壇而哭，衣
冠裳以素，與馬不飾，食不祭，內不御心，喪之禮也。禮
庶民為國君齊衰三月，寄公為所寓士仕馬而已者，
大夫以道去而猶未絕者，皆服齊衰三月，言與民同
也。今去其君雖非喪也，然重絕君臣之義，故以心喪
自處而期以三月，故曰三月而復服也。韠屨，韠屨也。
周官韠屨氏，蓋蠻夷之服也。韋去毛而未為韋，非吉
屨也。孔子去魯以微罪行，樂毅云：忠臣去國，不潔其
名，以已無罪而說於人，則君有罪矣。君子不忍為者，
厚之至也。廣安游氏曰：古之以凶禮自處者三，而
喪事不與焉。戰勝以喪禮處之，凶災以喪禮處之，去
國以喪禮處之，重天災也。去國以喪禮處之，重去本也。
且喪禮處之，重天災也。去國以喪禮處之，重去本也。
非特以喪禮自處也。人將以喪禮弔之，馬去國則弔
之，凶災則弔之，故夫去國古人之所大患也。棄其君

棄其位棄其宗廟棄其父母之邦此其去國之可悲也明矣

大夫士見

現

於國君君若勞

去聲

之則還

旋

辟

關

再拜稽

首

此言大夫士出聘他國見於主君君若問勞其道路之勤苦則旋轉退避乃再拜稽首也

君若迎拜則還辟不敢答拜

聘賓初至主國大門外主君迎而拜之賓則退卻不敢答拜而抗賓主之禮也

大夫士相見雖貴賤不敵主人敬客則先拜客客敬主人則先拜主人

敬而先拜謂大夫士聘於他國而見其卿大夫士也

同國則否

馬氏曰相見貴於相下相下貴於相先士相見禮若先生具爵者請見之則辭辭不

得命則先見之然則拜之禮蓋亦若此故主人敬客則先拜客客敬主人則先拜主人也燕禮賓升自西階主人先拜至聘禮賓入大門主君先拜迎則先拜之禮不特大夫士而已記之所言亦一端也

凡非弔喪非見

現

國君無不答拜者

弔喪而不答主人之拜者以為助執喪事之凡役而

來非行賓主之禮也故士喪禮有賓則拜之賓不答拜是也士見本國之君尊卑遠絕故君不答拜此二者之外無不答拜也

大夫見於國君國君拜其辱士見於大夫大夫拜其辱同國始相見主人拜其辱

君拜大夫之辱大夫拜士之辱皆謂初為大夫初為士而來見也此後朝見則有常禮矣士相見禮士見國君君答拜者亦以其初為士而敬之也主人拜辱

拜其先施也此謂尊卑相等者言同國則異國亦當然矣

君於士不答拜也非其臣則答拜之大夫於其臣雖賤必答拜之

君於士雖不答拜然不以施之他國之士者以其非己之臣也大夫答賤臣之拜避國君之體也

男女相答拜也

男女嫌疑之避亦多端矣然拜而相答所以為禮豈

以行禮為嫌哉故記者明言之

國君春田不圍澤大夫不掩羣士不取麇

迷卯

春田蒐獵也澤廣故曰圍羣聚故曰掩麇鹿子凡獸
子亦通名之麇卯微故曰取君大夫士位有等降故
所取各有限制此與王制文異。方氏曰用大者取
愈廣位卑者禁愈嚴

歲凶年穀不登君膳不祭肺馬不食穀馳道不除祭事
不縣

玄

大夫不食梁士飲酒不樂

膳者美食之名肺為氣主周人所重故食必先祭肺
言不祭肺示不殺牲為盛饌也馳道人君驅馳車馬
之路不除不埽除也祭必有鐘磬之縣今不縣言不
作樂也大夫食黍稷以梁為加公食大夫禮設正饌
之後乃設稻粱所謂加也自君至士各舉一事尊者
舉其大者卑者舉其小者其實互通耳

藍曰呂氏
曰仁者以

天下為一身者也疾痛癢癢所以感吾惻怛怵惕之心非有知力與乎其間也以天下為一身者一民一物莫非吾體故舉天下所以同吾愛也故歲凶年穀不登民有飢色國君大夫士均與其憂君非不能玉

欽定四庫全書

禮記大全
卷二

十五

食大夫士非無田祿仁人之心與民同之雖食不能飽也馬不食穀則芻秣而已公明儀曰庖有肥肉廄有肥馬民有饑色野有餓莩此率獸而食人也奪人食而食馬與牲仁人所不為也凡此皆與民同憂自貶之道也及乎有九年之蓄雖凶旱水溢民無菜色然後天子食日舉以樂則與之同其憂者無不同其樂也

君無故玉不去身大夫無故不徹縣
士無故不徹琴瑟

瑟

故謂災變喪疾之類

藍田呂氏曰君子致禮以治躬致樂以治心養其血氣志慮無

所不在於和使放心邪氣不得接焉此樂所以無故而不得舍也災患喪病方在所憂故不可泰以樂古

之君子必佩玉右徵角左宮羽趨以采薺行以肆夏
故不去身非特為飾亦有玉聲銚鳴中於五音近於
樂也

士有獻於國君他日君問之曰安取彼再拜稽首而后
對

安取彼猶言何所得彼物也

大夫私行出疆必請反必有獻士私行出疆必請反必
告君勞去聲之則拜問其行拜而后對

大夫士以私事出疆皆請於君其反也大夫有獻而

士不獻不以卑者之物瀆尊上也故但告還而已勞之者慰勞其道路之勞苦問其行者詢其游歷之所

至也先拜後答急謝見問之寵也

長樂陳氏曰古之為臣也無私行出

疆之禮告於君而後可也臣之於君子之於親一也子於親出必告反必面或有賜焉必獻以示不敢有已而無私蓄也臣於君亦然

國君去其國止之曰奈何去社稷也大夫曰奈何去宗廟也士曰奈何去墳墓也國君死社稷大夫死衆士死

制

死社稷謂國亡與亡也死衆謂討罪禦敵敗則死之也死制受命於君難毋苟免也。方氏曰國君曰死社稷而大夫士不曰死宗廟墳墓何也蓋止其去者存乎私情死其事者存乎公義也。趙氏曰社所以祭五土之神稷所以祭五穀之神稷非土無以生土非稷無以見生生之效故祭社必及稷以其同功均利以養人故也周禮大司徒設社稷之壇壇者累土以為高也不屋而壇社壇在東稷壇在西

藍田呂氏曰臣民各

止其君使勿去忠厚之至也以社稷宗廟墳墓為言者皆指其所本也先王之建國必為之置社稷使其君守之為土地人民之主此有國者所以以社稷為言也大夫之有宗廟士之保其丘墓義亦猶是大夫士則有以道去其君諸侯有國受之於天子有死而無去也然此去者國滅君死正也苟社稷無隕先君有後則雖有不安其國致位而去特一身去就而已是亦有可去之義禮所以有寓公也人臣受命於君有死無二而已君之有社稷受命于天子者也大夫之衆士之制受命于其君者也故人臣敬君莫先于敬命棄命不死不敬莫大焉

君天下曰天子朝諸侯分職授政任功曰予一人

天子者君臨天下之總稱臣民通得稱之予一人則

所自稱也

踐阼臨祭祀內事曰孝王某外事曰嗣王某

踐履也阼主階也履主階而行事故曰踐阼也宗廟之事為內郊社之事為外祝辭稱孝王某者事親之辭嗣王某者事神之辭也

臨諸侯

軫

於鬼神曰有天王某甫

天子巡狩而至諸侯之國必使祝史致鬼神當祭者之祭以不親往故祝辭稱字曰某甫甫者丈夫之美

稱也。呂氏曰：眡猶畦，眡之相接，然與交際之際同義。方氏曰：望秩之禮，必於野外，故以眡言之。眡田間道也。祭於眡而謂之眡，猶祭於郊而謂之郊也。天子適諸侯，非其常，蓋有時也。故於是特言有焉。

崩曰：天王崩，復曰：天子復矣。告喪曰：天王登假。遐措之廟立之主曰帝。

自上墜下曰崩，亦壞敗之稱。王者卒，則史書於策曰：天王崩。復者，人死則形神離，古人持死者之衣，升屋

北面招呼死者之鬼令還復體魄冀其再生也故謂之復天子復者升屋招呼之辭臣子不可名君故呼曰天子復也疏云以例言之則王后死亦呼王后復也告喪赴告侯國也呂氏讀假為格音引王假有廟與來假來享言其精神升至於天愚謂遐乃遠邈之義登遐言其所升高遠猶漢書稱大行行乃循行之行去聲以其往而不反故曰大行也措置也立之主者始死則鑿木為重以依神既虞而埋之乃作主以

依神也。○呂氏曰考之禮經未有以帝名者史記夏殷之王皆以帝名疑殷人祔廟稱帝遷據世本當有所考至周有謚始不名帝歟

天子未除喪曰予小子生名之死亦名之

鄭氏曰生名之曰小子王死亦曰小子王也晉有小子侯是僭號也。○呂氏曰春秋書王子猛卒不言小子者臣下之稱與史策之辭異也

天子有后有夫人有世婦有嬪有妻有妾

三夫人九嬪二十七世婦八十一御妻自后而下皆

三因而增其數妾之數未聞

馬氏曰昏義曰古者天子后立六宮三夫人九

嬪二十七世婦八十一御妻以聽天下之內治此曰天子有后有夫人有世婦有嬪有妻有妾蓋昏義言後宮之治故兼天子后言之而備六宮之數而妾不與焉曲禮言後宮之位故止言天子而備六宮之名則雖后之尊亦曰有后而妾之賤亦與焉

天子建天官先六大

泰

曰大宰大宗大史大祝大士大

卜典司六典

此六大者天官之屬也以其所掌重於他職故曰先

天子之五官曰司徒司馬司空司士司寇典司五衆
此五官與天官列而為六五衆者五官屬吏之羣衆
也

天子之六府曰司土司木司水司草司器司貨典司六
職

府者藏物之所此府主藏六物之稅

天子之六工曰土工金工石工木工獸工草工典制六
材

此六材者六工之所用也故不曰典司而曰典制已
上四條舊說皆為殷制其實無所考證皆臆說耳

五官致貢曰享

呂氏曰歲終則司徒以下五官各致其功獻於王故

謂之享貢功也享獻也

石林葉氏曰自夫人以下至
革工其分列之先後與名號

之異同亂於周官之序宜康成以為殷禮也蓋治天
下必自內始夫人嬪妾莫不有所司而不言司者以
其主於內而已內治則家道正可以推而及國大宰
王者所賴以治國也故建官特先之其屬則大宗大
史大祝大士大卜皆有書故言六典六典所以奉天
道也天道主之以天官而地道不可以無職故次之

以司徒司徒所奉者地道所掌者邦教也有教不可
以無政故次之以司馬司馬所掌者邦政有政不可
以無事故次之以司空有政事則財用足人輕於從
善而耻于犯法也故次之以司士正羣臣之版以詔
爵祿終之以司寇詰邦國之禁以刑暴亂五官各率
其屬而治故言五衆所以奉地道也天官先大宰以
奉天道地官先司徒以奉地道人君於是可以輔相
裁成之時也然而萬物生於天長於地人所賴以相
養不可不急於先務故六府典司六職六工典制六
材亦先王之智急於成物以養天下也是以土也木
也水也草也器也貨也聚之於人則曰六府分之於
所治則曰六職金也土也石也木也獸也草也造之
於人則曰六工見之於用則曰六材府以聚其物而
後命官以分治故後言六職材必待人而有成非人
則不能成其材故先言六工治天下至於萬物各得
其成材此先王所以裁成天地之道輔相天地之宜

以左右民而治也。雖然功罪不進於上，則下之情不通。黜陟不行於下，則上之權不立。故五官各致其貢，以通於王也。

五官之長曰伯，是職方，其擯於天子也。曰天子之吏，天子同姓，謂之伯父。異姓，謂之伯舅。自稱於諸侯曰天子之老，於外曰公，於其國曰君。

司徒以下五官之長者，天子之三公也。伯者，長大之名。三公無異職，即六卿中三人兼之。任左右之職，謂之相。九命而作伯，則分主畿外諸侯。如公羊云：自陝

而東者周公主之自陝而西者召公主之是也是職
方者言二伯於是職主其所治之方也天子之吏擯
者之辭也此伯若是天子同姓則天子稱之為伯父
若異姓則稱為伯舅皆親之之辭也此伯皆有采地
在天子畿內自稱於私土采地之外則曰公自稱於
采地之內則曰君也

九州之長入天子之國曰牧天子同姓謂之叔父異姓
謂之叔舅於外曰侯於其國曰君

天下九州天子於每州之中擇諸侯之賢者一人加之一命使主一州內之列國取牧養下民之義故曰牧叔父叔舅降於伯父伯舅也自稱於所封國之外

則曰侯若與國內臣民言則自稱曰君也

長樂劉氏曰昔三代

聖人行己之法必稽於古首出庶物而不敢自尊也德配二儀而不敢自大也莫尊乎父而謂同姓三公為伯父莫親乎母而謂異姓三公為伯舅非徒自示寡昧卑己以尊賢也蓋以億兆之命舒慘繫于一人政教之源治亂根於一德非屈己以下賢崇道以率衆未易化也是以於九州之伯同姓者謂之叔父異姓者謂之叔舅焉

其在東夷北狄西戎南蠻雖大曰子於內自稱曰不穀
於外自稱曰王老

九州之外不過子男之國天子亦選賢以為牧但以
卑且遠故不以牧稱亦不稱父舅朝見之時擯辭惟
曰子雖或有功益地至侯伯之數其爵亦不過子故
云雖大曰子也如楚在春秋雖大國而其爵則稱子
也穀善也於內與其臣民言也外謂夷狄之境也自
稱王老言天子之老臣也

庶方小侯入天子之國曰某人於外曰子自稱曰孤

四夷之君其來荒遠故以庶方名之庶衆也某人若
牟人介人之類。疏曰於外曰子者此君在其本國
外四夷之中自稱依其本爵若男亦稱男也若自與
臣民言則稱孤孤者特立無德之稱也

天子當依上聲而立諸侯北面而見現天子曰覲天子當

宁珍呂反而立諸公東面諸侯西面曰朝

鄭氏曰春朝受摯於朝受享於廟秋覲一受之於廟

朝者位於內朝而序進覲者位於廟門外而序入
疏曰依狀如屏風以絳為質高八尺東西當戶牖之
間繡為斧文亦曰斧依天子見諸侯則依而立負之
而南面以對諸侯也宁者爾雅云門屏之間謂之宁
人君視朝所宁立處盖宁立以待諸侯之至故云當
宁而立也諸侯春見曰朝秋見曰覲又曰凡天子三
朝一在路門內謂之燕朝大僕掌之二是路門外之
朝謂之治朝司士掌之其三是臯門之內庫門之外

謂之外朝朝士掌之諸侯亦有此三朝

廣安游氏曰夫禮不可一

端盡也不有君臣相臨之禮則無以見同姓異姓親親之恩夫有賓主相與之禮則無以見同姓異姓親親之恩夫諸侯之中有伯父焉有叔父焉有伯舅焉有叔舅焉有兄弟焉有昏姻焉三王家天下所恃以為天下者不獨恃其利勢也天子以親親之恩而臨諸侯諸侯亦以親親之恩而報天子上下和睦同獎一姓所以數百年長久安寧而無患由此之故且尊卑之分不統於一聖人固以為不可天子之尊諸侯之卑其自然之分固也然諸父兄弟舅甥昏姻相去之遠而久不相見於其來朝忘親親之恩尊以分臨之聖人之心無乃有所不安於此此親親之恩賓主之禮所以行於春朝而異於覲禮之受於廟而臣皆北面也此三代之至文聖人待諸侯之禮備矣

諸侯未及期相見曰遇相見於郤隙地曰會

未及期在期日之前也郤地間隙之地也下言相見及期日也遇有遇禮會有會禮

諸侯使大夫問於諸侯曰聘

比年小聘三年大聘小聘大夫往大聘則卿往

約信曰誓蒞牲曰盟

約信者以言語相要約為信也用誓禮蒞臨也春秋所書遇會盟聘皆有之惟無誓耳疏云盟之為法先

鑿地為方坎殺牲於坎上割牲左耳盛以珠盤又取血盛以玉敦用血為盟書成乃歃血而讀書置牲坎

中加書於上而埋之謂之載書也

長樂陳氏曰盟會或衆遇不必衆春

秋公及宋公遇於清宋公衛侯遇於垂是遇不該於衆也周禮有盟邦國有盟萬民春秋有諸侯會有大夫會有兵車會是盟會有小大而該於衆也先王之時結民以忠信誠慤之心維邦國以比小事大之禮然而會遇盟誓之禮未嘗弛於天下將使夫人明則知好惡幽則知信畏然後天下為一家而無異俗中國為一人而無殊心則會遇盟誓之輔於教也豈不懿哉

諸侯見天子曰臣某侯某其與民言自稱曰寡人其在

凶服曰適

丁歷反

子孤

臣某侯某如云臣齊侯小白臣晉侯重耳之類擯者告天子之辭也凡自稱皆曰寡人不獨與民言也此略言之耳適子孤亦擯者告賓之辭也

臨祭祀內事曰孝子某侯某外事曰曾孫某侯某死曰薨復曰某甫復矣

內外事見前章曾孫猶晉平公禱河而稱曾臣彪之類天子德厚流光故外事稱嗣王某諸侯不敢言繼

嗣推始封之君而祖之故稱曾孫也薨之為言薨也
幽晦之義本國史書之辭復稱字臣不名君也

既葬見天子曰類見言諡曰類

呂氏曰繼先君之德乃得受國而見天子故曰類見

誅先君之善而請諡於天子故亦曰類

何氏曰類其德而稱之如

經天緯地
曰文也

諸侯使人使去聲於諸侯使者自稱曰寡君之老

寡君之老惟上大夫可稱見玉藻

天子穆穆諸侯皇皇大夫濟濟

上聲

士蹌蹌

七羊反

庶人僬

僬

子妙反

呂氏曰穆穆幽深和敬之貌皇皇壯盛顯明之貌濟濟修飾齊一之貌蹌蹌翔舉舒揚之貌庶人見乎君不為容進退趨走僬僬雖無所考大抵趨走促數不為容之貌也

天子之妃曰后諸侯曰夫人大夫曰孺人士曰婦人庶人曰妻

鄭氏曰妃配也后之言後也夫之言扶孺之言屬婦之言服妻之言齊

公侯有夫人有世婦有妻有妾夫人自稱於天子曰老婦

畿內諸侯之妻因助祭於王后或因獻鬴之屬故得以見天子。陳氏曰不以老稱不足以任其事不以婦稱非所以能事人故稱老婦。應氏曰年高者固可稱老婦其始嫁者宜如何稱則亦曰婦而配之以

卑小之名耳

自稱於諸侯曰寡小君

疏曰此諸侯謂他國君也古者諸侯相饗夫人亦出
故得自稱也坊記云陽侯殺繆侯而竊其夫人故大
饗廢夫人之禮君之妻曰小君而云寡者亦從君為
謙也

自稱於其君曰小童自世婦以下自稱曰婢子

小童未成人之稱婢之言卑也

子於父母則自名也

自稱其名

蘇田呂氏曰子之名父母所命敬親之命不敢有他稱也

列國之大夫入天子之國曰某士自稱曰陪臣某於外曰子於其國曰寡君之老使者自稱曰某

某士擯者稱其人曰某國之士也晉韓起聘于周擯者曰晉士起蓋列國卿大夫其命數與天子之士等也陪重也諸侯為天子之臣已又為諸侯之臣也於外曰子者亦擯者辭在他國則擯者稱其姓而曰子

春秋閔二年齊高子來盟高傒是也於其國曰寡君
之老謂在己國與人語則以此自稱也使者自稱曰
某某名也若為使在他國與彼君語則稱名也

天子不言出諸侯不生名君子不親惡諸侯失地名滅
同姓名

疏曰君子不親惡者謂孔子書經見天子大惡書出
以絕之諸侯大惡書名以絕之君子不親此惡人故
書出名以罪之也。呂氏曰賢者貴者皆謂之君子天

子無外安得而言出然而言出者德不足以君天下而位號存焉耳諸侯不生名惟死而告終然後名之然有生名者德不足以名君子而位號存焉耳故天子不言出諸侯不生名皆謂君子不親惡故也。陳氏曰言出所以外之生名所以賤之春秋書天王出居于鄭譏之也書以蔡侯獻舞歸以其失地也書衛侯燬滅邢以其滅同姓也夫天子之言出諸侯之生名皆有大惡在所棄焉君子所以不親也然春秋書

天王居於某地者二而不言出諸侯失地而奔者十
五滅同姓者三而有不生名者莫非出居而事有異
同莫非失地滅同姓而罪有輕重故也蓋諸侯義莫
大於保國仁莫大於親親不能保國而至於失地不
能親親而至於滅同姓其名之也宜矣
為人臣之禮不顯諫三諫而不聽則逃之

陳氏曰孔子之於魯百里奚之於秦未嘗諫而去龍
逢之於夏比干之於殷則死於諫而不去何也蓋事

有輕重勢有可否君子以禮為守以義為行迹雖不同其趨一也

子之事親也三諫而不聽則號泣而隨之

平聲

呂氏曰君臣義合也父子天合也君臣其合也與父子同其不合也去之與父子異也

嚴陵方氏曰犯而無隱者臣之義也

諫而不顯者臣之私也此主於人臣之禮故曰不顯諫仁之於父子義之於君臣義有所不為仁有所不忍臣之於君三諫不聽尚復留焉則固位矣固位者義所不為則逃之子之於親三諫不聽苟遂絕之則傷恩矣傷恩者仁所不忍故隨之逃之全其身而立我義之盡也隨之將以感其心而立人則仁之至也臣

子之道
備矣

君有疾飲藥臣先嘗之親有疾飲藥子先嘗之醫不三世不服其藥

呂氏曰醫三世治人多用物熟矣功已試而無疑然

後服之亦謹疾之道也

嚴陵方氏曰君於平居無事之時其膳也膳夫品嘗之大

子親視之亦以致其謹而已則於有疾之時尤所不可忽也醫之為術苟非父祖子孫傳業則術無自而精術之不精其可服其藥乎周官司徒以世事教能者良以此也雖然經之所言亦道其常而已若夫非傳業而或自得於心者未及三世固在所取也

儻人必於其倫

疏曰不得以貴比賤為不敬也。方氏曰禹稷顏回
時不同矣孔子俱以為賢儻之以道也夷惠伊尹迹
不同矣孟子俱以為聖儻之以心也子夏以有若似
孔子徒儻之以貌而已不知聖賢之德不倫也公孫
丑以管仲比孟子徒擬之以位而已不知王霸之道
不倫也

問天子之年對曰聞之始服衣若干尺矣

若如也未定之辭數始於一而成於十十字從一從十故言若干謂或如一或如十凡數之未定者皆可言顏註食貨志云千箇也謂當如此箇數意亦近之問國君之年長曰能從宗廟社稷之事矣幼曰未能從宗廟社稷之事也

為國以禮而禮莫重於祭宗廟社稷事無有先於此者能則知其長未能則知其幼

問大夫之子長曰能御矣幼曰未能御也

古者五十命為大夫故不問其年而問其子之長幼
御謂御車也御者六藝之一幼則未能。疏曰御謂
主事也官有世功子學父業故有御事之因

問士之子長曰能典謁矣幼曰未能典謁也

謁請也典謁者主賓客告請之事士賤無臣下自典
告也

問庶人之子長曰能負薪矣幼曰未能負薪也

負薪者庶人力役之事長則能

嚴陵方氏曰貴賤雖
各不同莫不有為以

用事政於問國君之年則以從宗廟社稷之事為對
焉宗廟社稷蓋事神之事也御則於事有所制御蓋
治人之事也典謂則典主請謁蓋事人之事也負薪
則力役之事而已事神者重於治人治人者尊於事
人事人者逸於力役此
重輕尊卑逸勞之別也

問國君之富數

上聲

地以對山澤之所出

數地舉其土地之廣狹如百里七十里五十里各言
之也山澤所出如魚鹽蜃蛤金玉錫石之類也

問大夫之富曰有宰食力祭器衣服不假

宰邑宰也有宰則有采地矣食力謂食下民賦稅之

力衣服祭服也

問士之富以車數對

上士三命得賜車馬故問士富則以車數對也

問庶人之富數

上聲反

畜許又以對

庶人受田有定制惟畜牧之多寡在乎人故數畜以對也

天子祭天地祭四方祭山川祭五祀歲徧諸侯方祀祭山川祭五祀歲徧大夫祭五祀歲徧士祭其先

呂氏曰此章泛論祭祀之法冬日至祭天夏日至祭地四時各祭其方以迎氣又各望祭其方之山川五祀則春祭戶夏祭竈季夏祭中雷秋祭門冬祭行此所謂歲徧諸侯有國國必有方祭其所居之方而已非所居之方及山川不在境內者皆不得祭故曰方祀祭法天子立七祀加以司命泰厲諸侯五祀有司命公厲而無戶竈大夫三祀有族厲而無中雷戶竈士二祀則門行而已是法考於經皆不合曾子問天

子未殯五祀之祭不行士喪禮禱乎五祀則自天子
至士皆祭五祀祭法言涉恠晏不經至於所稱廟制
亦不與諸經合

嚴陵方氏曰德有隆殺故所祭之神
有大小業有廣狹故所祭之神有遠

近也

凡祭有其廢之莫敢舉也有其舉之莫敢廢也非其所
祭而祭之名曰淫祀淫祀無福

呂氏曰廢之莫敢舉如已毀之宗廟變置之社稷不
可復祀也舉之莫敢廢如已修之壇墠而輒毀已正

之昭穆而輒變也。非所祭而祭之，如法不得祭，與不當祭而祭之者也。魯立武宮，立煬宮，舉其廢也。躋僖公廢其舉也。魯之郊禘與祀文王祀爰居，祭所不當祭也。淫過也。以過事神，神弗享也。故無福。方氏曰：可廢而廢可舉而舉者，存乎義。因所廢而莫敢舉，因所舉而莫敢廢者，存乎禮。蓋禮有經義有權也。

北漢陳氏

曰天子祭天地諸侯祭山川大夫祭五祀士祭其先古人祀典品節一定不容紊亂在諸侯不敢僭天子而祭天地在大夫亦不敢僭諸侯而祭山川如季氏旅泰山便不是禮故曰非當祭而祭之者名曰淫祀

淫祀無福淫祀不必皆是不正之鬼假如
正當鬼神自家不應祀而祀便是淫祀

天子以犧牛諸侯以肥牛大夫以索牛士以羊豕

毛色純而不雜曰犧養於滌者曰肥求得而用之曰
索。疏曰此謂天子大夫士也若諸侯大夫即用少
牢士則用特牲其喪祭則大夫亦得用牛士亦用羊
豕故雜記云上大夫之虞也少牢卒哭成事祔皆大
牢下大夫之虞也特牲卒哭成事祔皆少牢是也

支子不祭祭必告于宗子

疏曰支子庶子也祖禰廟在適子之家庶子賤不敢
輒祭若宗子有疾不堪當祭則庶子代攝可也猶必
告于宗子然後祭。○呂氏曰別子為祖繼別為宗百
世不遷者大宗也繼禰繼祖繼曾祖繼高祖五世則
遷者小宗也宗子上繼祖禰族人兄弟皆宗之冠娶
妻必告死必赴況於祭乎所宗乎宗子者皆支子也
支子不敢祭也如諸侯不敢祖天子大夫不敢祖諸
侯尊者之祭非卑者所敢尸也故宗子為士庶子為

大夫以上牲祭於宗子之家祝曰孝子某為介子某薦其常事則支子雖貴可以用其祿而不敢專其事

也宗子去在他國則支子攝主以祭其禮有殺

程子曰古

所謂支子不祭者唯使宗子立廟主之而已支子雖不祭至於齊戒致其誠意則與主祭者不異可與則以身執事不可與則以物助但不別立廟為位行事而已後世如欲立宗子當從此義雖不祭情亦可安若不立宗子徒欲廢祭適足長情慢之志不若使之祭猶愈於已也

凡祭宗廟之禮牛曰一元大武

此以下凡二十一物元頭也武足迹也牛肥則迹大

豕曰剛鬣

豕肥則鬣剛

豚曰脂突肥

脂者充滿之貌

羊曰柔毛

羊肥則毛細而柔弱

雞曰翰音

翰長也雞肥則鳴聲長

犬曰羹獻

犬肥則可為羹以獻凡煮肉皆謂之羹特牲禮云羹
飪穎考叔曰未嘗君之羹是也

雉曰䟽趾

雉肥則兩足開張故曰䟽趾

兔曰明視

兔肥則目開而視明故曰明視

脯曰尹祭

尹正也脯欲粿割方正

橐考魚曰商祭

橐乾也商度也商度其燥濕之宜

鮮仙魚曰脰提祭

脰直也魚之鮮者不餒敗則挺然而直

水曰清滌

水玄酒也水可漑濯故曰清滌

酒曰清酌

古之酒醴皆有清有糟未沛者為糟既沛者為清也

黍曰薌香合

黍熟則黏聚不散其氣又香故曰薌合

粱曰薌基箕

粱穀之強者其莖葉亦香故曰薌箕

稷曰明咨染

稷粟也明則足以交神祭祀之飯謂之染盛

稻曰嘉蔬

蔬與䟽同立苗䟽則茂盛嘉美也

韭曰豐本

其根本豐盛也

鹽曰鹹鹺

才何反

鹹鹺鹽味之厚也

玉曰嘉玉

無瑕之玉也

幣曰量幣

中廣狹長短之度也。䟽曰此等諸號若一祭並有

則舉其大者或惟有犬雞惟有魚兔則各舉其號故

經備載其名

藍田呂氏曰祭宗廟之禮內則盡志外則盡物所謂盡物者盡其物之至美以

薦之然後可以不嫌於心鬼神其來享也故祝辭皆舉其美而言言於物不敢不盡也禽獸之獻以肥腍為美魚腊鮮稟以得宜為美水與酒以潔清為美黍稷稻粱以馨香明潔為美韭以苗之盛為美鹽以味之厚為美玉以不瑕為美幣以可制為美

天子死曰崩諸侯曰薨大夫曰卒士曰不祿庶人曰死

在牀曰尸在棺曰柩羽鳥曰降

如字

四足曰漬

自死

寇曰

兵

疏曰卒畢竟也士祿以代耕不祿不終其祿也死者
漸也消盡無餘之謂尸陳也古人病困氣未絕之時
下置在地氣絕之後更還牀上所以如此者凡人初
生在地病將死故下復其初生冀得脫死重生也若
其不生復反本牀既未殯飲陳列在牀故曰尸也。
呂氏曰柩久也比化者無使土親膚故在棺欲其久
也羽鳥飛翔之物降而下則死矣獸能動之物腐敗

則死矣漬謂其體腐敗漸漬也兵者死於寇難之稱也

祭王父曰皇祖考王母曰皇祖妣父曰皇考母曰皇妣

夫曰皇辟

璧

曰皇曰王皆以君之稱尊之也考成妣嬭辟法也妻所法式也為之宗廟以鬼享之不得不異其稱謂也

生曰父曰母曰妻死曰考曰妣曰嬭壽考曰卒短折

市設

反
曰不祿

嬪者婦人之美稱嬪猶賓也夫所賓敬也短折夭橫而死也此言卒與不祿與上文大夫士之稱同者彼以位之尊卑言此以數之脩短言也又按呂氏說死寇曰兵之下當以此二句承之蓋錯簡也。謝氏曰易曰有子考無咎又曰意承考也又書言事厥考厥長之類皆非死而後稱蓋古者通稱後世乃異之耳天子視不上於袷叔不下於帶國君綏妥視大夫衡視士視五步

天子視謂視天子也袷朝服祭服之曲領也妥頽下
之貌視國君者目不得平看於面當視其面之下袷
之上也衡平也大夫之臣視大夫平看其面也士視
五步者士之屬吏視士亦不得高面下帶而得旁視
左右五步之間也

凡視上於面則教

傲

下於帶則憂傾則姦

呂氏曰上於面者其氣驕知其不能以下人矣下於
帶者其神奪知其憂在乎心矣視流則容側必有不

正之心存乎胷中矣此君子之所以慎也

長樂劉氏曰臣之事

君敬盡於心則五事罔有弗正然於視瞻苟無等降在禮為愆矣故視於天子諸侯大夫士各不同焉

君命大夫與士肄

具

在官言官在府言府在庫言庫在

朝言朝

人君有命令則大夫士相與肄習之其事或在官或

在府或在庫或在朝隨其所在而謀議之官者職守

司存之總名府庫者貨器藏貯之異號朝則君臣會

見之公庭也

藍田呂氏曰先時豫慮思不出其位皆所以處君命也居是位也不敢以侵他

事治是事也不敢以有他慮此所以志無所分政無不舉也

朝言不及犬馬

犬馬微賤不當言之於朝

輟朝而顧不有異事必有異慮故輟朝而顧君子謂之固

朝儀當肅不宜為左右之顧異猶他也敬心不存則形諸外此所以知其有他事他慮也固謂鄙野不達

於禮也

藍田呂氏曰在朝而言犬馬慢也敬不在君也輟朝而他顧亦敬不在君也有異心存焉

欽定四庫全書

禮記大全
卷二

非所治者皆異事也非所謀者皆
異慮也故君子謂之固固野陋也

在朝言禮問禮對以禮

朝廷之上凡所當言者皆禮也一問一對必稽於禮
孔子在宗廟朝廷便便言唯謹爾盡此道也

大享不問卜不饒富

呂氏曰冬至祀天夏至祭地日月素定故不問卜至
敬不壇掃地而祭牲用犢酌用陶匏席用藻結視天
下之物無以稱其德以少為貴焉故不饒富

凡摯天子鬯諸侯圭卿羔大夫鴈士雉庶人之摯匹木
童子委摯而退野外軍中無摯以纓拾矢可也

摯與贄同執物以為相見之禮也鬯釀秬黍為酒曰
秬鬯和以鬱金之草則曰鬱鬯不以鬱和則直謂之
鬯言其芬香條暢於上下也天子無客禮而言摯者
用以禮見於神而已圭命圭也公桓圭侯信圭伯躬
圭子穀璧男蒲璧比不言璧略也羔取其羣而不失
類且潔素也鴈取其知時且飛有行列也雉取其性

之耿介且文飾也匹讀為驚野鴨曰鳧家鴨曰驚不能飛騰如庶人之終守耕稼也童子不敢與成人為禮或見師友而執贄則奠委于地而自退避之也纓馬之繁纓即馬鞅也拾射韞也矢箭也或野外或軍中隨所有用之也

婦人之摯棋和榛脯脩棗栗

棋形似珊瑚味甜美一名石李榛似栗而小脯即今之脯也脩用肉煨治加薑桂乾之脯形方正脩形稍

長并棗栗六物婦初見舅姑以此為摯也左傳女摯

不過榛栗棗脩以告虔也

長樂陳氏曰禮云無辭不相接也無禮不相見也欲

民之無相瀆也又云君子於其所尊不敢質也故貴至於邦君賤至於庶人以至婦人童子相見不依摯不足以為禮摯而不稱德不足以為義此玉帛禽鳥榛栗棗脩之用所以不一也

納女於天子曰備百姓於國君曰備酒漿於大夫曰備

婦灑


去聲所買反

呂氏曰不敢以伉儷自期願備妾媵之數而已皆自

卑之辭也

嚴陵方氏曰酒漿者奉祭祀之物不如是不足以配國君故曰備酒漿婦灑者有家

之事不如是不足以配大夫故曰備婦灑凡此皆
主人之謙辭耳故每言備焉備者所以備其乏也



禮記大全卷二

欽定四庫全書

經部

禮記大全卷三

詳校官監察御史

臣孫家賢

給事中

臣溫常綬覆勘

總校官知縣

臣

楊懋珩

校對官中書

臣

陳墉

謄錄監生

臣

方汝觀

欽定四庫全書

禮記大全卷三

明 胡廣等 撰

檀弓上

劉氏曰檀弓篇首言子游及篇內多言之疑是其門人所記

公儀仲子之喪檀弓免焉仲子舍其孫而立其子檀弓曰何居我未之前聞也趨而就子服伯子於門右

公儀氏仲子字魯之同姓也檀弓魯人之知禮者袒免本五世之服而朋友之死於他邦而無主者亦為之免其制以布廣一寸從項中而前交於額又却向後而繞於髻也適子死立適孫為後禮也弓以仲子舍孫而立庶子故為過禮之免以弔而譏之何居怪之之辭猶言何故也此時未小斂主人未居阼階下猶在西階下受其弔故弓弔畢而就子服伯子於門右而問之也

嚴陵方氏曰免之為服特施於五世之親爾而朋友死於他邦者亦服之仲子

之於檀弓既非五世之親而其喪又非死於他邦者
檀弓之免也蓋非所服而服之也服非所服之服所
以譏立非所
立之意爾

曰仲子舍其孫而立其子何也伯子曰仲子亦猶行古
之道也昔者文王舍伯邑考而立武王微子舍其孫腓
而立衍也夫仲子亦猶行古之道也子游問諸孔子孔
子曰否立孫

曰弓之問也猶尚也亦猶擬議未定之辭伯邑考文
王長子微子舍孫立衍或是殷禮文王之立武王先

儒以為權或亦以為遵殷制皆未可知否則以德不以長亦如太王傳位季歷之意歟。邱氏曰檀弓默而不復言子游疑而復求正非夫子明辨以示之孰

知舍孫立子之為非乎

長樂陳氏曰木之正出為本旁出為枝子之正出為嫡旁

出為庶故伐枝不足以傷木伐其本則木弊矣廢庶不足以傷宗廢其嫡則其宗絕矣本固而枝必茂嫡正而庶必寧此天地自然之理也先王知其然於是貴嫡而賤庶使名分正而不亂爭奪息而不爭故子生冢子接以太牢庶子少牢冢子未食而見庶子已食而見冠則嫡子於阼庶子於房外死則嫡子斬庶子期其禮之重輕隆殺如此豈有他哉以其傳重與不傳重之故也禮曰庶子不祭祖明其宗也又曰庶

子不祭禰明其宗也史曰父不祭於支庶之宅此嫡庶之分不可不辨也昔公儀仲子舍孫立子而檀弓弔以免司寇惠子舍嫡立庶而子游弔以麻衰皆重其服以譏之欲其辨嫡庶之分而已春秋之時宋宣公舍子與夷立弟穆公又舍子馮立與夷而與夷卒見殺莒紀公黜太子僕愛季佗而卒於召禍晉獻公殺世子申生立奚齊而卒至於亂晉齊靈公廢太子光立公子牙而卒以亂齊蓋嫡一而已立之足以尊正統而一人之情庶則衆矣立之則亂正統而啓覬覦之心宋莒齊晉之君不察乎此每每趨禍良可悼也

事親有隱而無犯左右就養無方服勤至死致喪三年
事君有犯而無隱左右就養有方服勤至死方喪三年

事師無犯無隱左右就養無方服勤至死心喪三年

饒氏曰左右音佐佑非也左右即是方養不止飲食之養言或左或右無一定之方子之於親不分職守事事皆當理會無可推托事師如事父故皆無方有方言左不得越右右不得越左有一定之方臣之事君當各盡職守故曰有方。朱氏曰親者仁之所在故有隱而無犯君者義之所在故有犯而無隱師者道之所在故無犯無隱也。劉氏曰隱皆以諫言父

子主恩犯則為責善而傷恩故幾諫而不可以犯顏
君臣主義隱則是畏威阿容而害義故匡救其惡勿
欺也而犯之師生處恩義之間而師者道之所在諫
必不見拒不必犯也過則當疑問不必隱也隱非掩
惡之謂若掩惡而不可揚于人則三者皆當然也惟
秉史筆者不在此限就養近就而奉養之也致喪極
其哀毀之節也方喪比方於親喪而以義並恩也心
喪身無衰麻之服而心有哀戚之情所謂若喪父而

無服也

長樂陳氏曰親育我報之以仁有隱至致喪皆仁也君履我報之以義有犯至方喪皆義

也師之成我同乎仁而不全乎仁同乎義而不全乎義故無犯與親同無隱則與親異無隱與君同無犯則與君異喪三年與君親同無服則與君親異○張子曰古不制師服師服無定體也見彼之善而已效之亦師也故有得其一言一義而如朋友者有親炙如兄弟者有成就已身而思如天地父母者此豈可一概服之故聖人不制其服心喪之可也孔子死門人一時心喪又豈可責其一槩以傳道久近而各盡其哀之隆殺如子貢獨居三年而后歸

季武子成寢杜氏之葬在西階之下請合葬焉許之入宮而不敢哭武子曰合葬非古也自周公以來未之有

改也吾許其大而不許其細何居命之哭

劉氏曰成寢而夷人之墓不仁也不改葬而又請合焉亦非孝也許其合而又命之哭焉矯僞以文過也且寢者所以安其家乃處其家於人之冢上於汝安乎墓者所以安其先乃處其先於人之階下其能安乎

皆不近人情非禮明矣

嚴陵方氏曰周官墓大夫之職凡爭墓地者聽其獄訟當

是時豈有夷人之墓以成寢者哉而季子乃有是事者以周官之法壞故也

子上之母死而不喪門人問諸子思曰昔者子之先君

子喪出母乎曰然子之不使白也喪之何也子思曰昔者吾先君子無所失道道隆則從而隆道污則從而污伋則安能爲伋也妻者是爲白也母不爲伋也妻者是

不爲白也母故孔氏之不喪出母自子思始也

子上之母子思出妻也禮爲出母齊衰期期而爲父後者無服心喪而已伯魚子上皆爲父後禮當不服者而伯魚乃期而猶哭夫子聞之曰甚而後除之此賢者過之之事也子思不使白喪出母正欲用禮耳

而門人以先君子之事為問則子思難乎言伯魚之過禮也故以聖人無所失道為對謂聖人之聽伯魚喪出母者以道揆禮而為之隆殺也惟聖人能於道之所當加隆者則從而隆之於道之所當降殺者則從而殺之污猶殺也是於先王之禮有所斟酌而隨時隆殺以從於中道也我則安能如是哉但為我妻則白當為母服今既不為我妻則白為父後而不當服矣子思是欲守常禮而不欲使如伯魚之加隆也

張子曰道隆則從而隆道污則從而污亦就其出母以定汚隆聖人則處情子思則守禮出妻不當使子喪之禮也子於母則不可忘若父不使之喪子固不可違父當然持心喪亦禮也若父使之喪而喪之亦禮也子思以爲我不至於聖人不敢不循禮而孔子使喪出母乃聖人處權子思自以爲不敢處權唯循禮而已不敢學孔子也故曰道隆則從而隆道污則從而汚

孔子曰拜而后稽顙顙乎其順也稽顙而後拜頌乎其至也三年之喪吾從其至者

此言喪拜之次序也拜拜賓也稽顙以頭觸地哀痛之至也拜以禮賓稽顙以自致謂之順者以其先加

敬於人而後盡哀於己為得其序也。頌者惻隱之發也。謂之至者以其哀常在於親而敬暫施於人為極自盡之道也。夫子從其至者亦與其易也。寧戚之意。○朱子曰：拜而后稽顙，先以兩手伏地如常，然後引首向前扣地也。稽顙而后拜者，開兩手而先以首扣

地却交手如常也。

長樂陳氏曰：拜而后稽顙，先致敬也。稽顙而后拜，先致哀也。禮廢滋

久。天下不知先稽顙之為重，而或以輕為重，是猶不知拜下之為禮。拜上之為恭，故孔子救拜之弊，則曰：吾從其至，救泰之弊，則曰：吾從下也。

孔子既得合葬於防曰吾聞之古也墓而不墳今丘也東西南北之人也不可以弗識也於是封之崇四尺孔子父墓在防故奉母喪以合葬墓塋域也封土為塋曰墳東西南北之人言其宦遊無定居也識記也為塋所以為記識一則恐人不知而誤犯一則恐已或忘而難尋故封之高四尺也

孔子先反門人後雨甚至孔子問焉曰爾來何遲也曰防墓崩孔子不應三孔子泣然流涕曰吾聞之古不脩

墓

雨甚而墓崩門人修築而後反孔子流涕者自傷其不能謹之於封築之時以致崩圯且言古人之所以不修墓者敬謹之至無事於修也

廬陵胡氏曰作墓時當為堅久之計

不可令崩壞而加治

孔子哭子路於中庭有人弔者而夫子拜之既哭進使者而問故使者曰醢之矣遂命覆醢

子路死於孔悝之難遂為衛人所醢孔子哭之中庭

師友之禮也聞使者之言而覆棄家醢蓋痛子路之禍而不忍食其似也。朱子曰子路仕衛之失前輩論之多矣然子路却是見不到非知其非義而苟為也。山陰陸氏曰哭以師友之間進之也。臨川吳氏曰哭師於寢哭朋友於寢門外中庭在寢之外寢門外之內故陸氏謂之師友之間。長樂陳氏曰遂命覆醢者非特不忍食之又不可忍見之也。曾子曰朋友之墓有宿草而不哭焉。

草根陳宿是期年之外可無哭矣

嚴陵方氏曰師猶父朋友相視猶兄

弟既已喪父之義處喪師則以喪兄弟之義處喪朋友不亦可乎墓有宿草則期年矣是以兄弟之義喪

之也然必以墓革爲節者蓋
生物既變而慕心可已故也

子思曰喪三日而殯凡附於身者必誠必信勿之有悔
焉耳矣三月而葬凡附於棺者必誠必信勿之有悔焉
耳矣

附於身者襲歛衣食之具附於棺者明器用器之屬
也。方氏曰必誠謂於死者無所欺必信謂于生者

無所疑

金華應氏曰附于棺者若卜其宅兆
卽封壤樹之事不獨明器之屬也

喪三年以爲極亡則弗之忘矣故君子有終身之憂而

無一朝之患故忌日不樂

喪莫重於三年既葬曰亡中庸曰事亡如事存雖已葬而不忌其親所以為終身之憂而忌日不樂也祭義曰君子有終身之喪忌日之謂也冢宅崩毀出於不意所謂一朝之患惟其必誠必信故無一朝之患也或曰殯葬皆一時事於此一時而不謹則有悔惟其誠信故無此一時不謹之患

馬氏曰君子之事親無所不用誠信而至

於明器則備物而不可用者亦可以為誠信乎蓋之死而致死之不仁而不可為也之死而致生之不知

而不可為也明器之用仁知之道誠信之至者也知此則可以無悔也。○長樂陳氏曰君子之於親有終制之喪有終身之喪終制之喪三年是也終身之喪忌日是也文王之於親忌日必哀而不樂豈非能全終身之憂乎有終身之憂仁也無一朝之患義也

孔子少孤不知其墓殯於五父之衢人之見之者皆以爲葬也其慎也蓋殯也問於耶曼父之母然後得合葬於防

不知其墓者不知父墓所在也殯於五父之衢者殯母喪也禮無殯於外者今乃在衢先儒謂欲致人疑

問或有知者告之也人見柩行於路皆以為葬然以引觀之殯引飾棺以輶葬引飾棺以柳翣此則殯引耳按家語孔子生三歲而叔梁紇死是少孤也然顏氏之死夫子成立久矣聖人人倫之至豈有終母之世不尋求父葬之地至母殯而猶不知父墓乎且母死而殯於衢路必無室廬而死於道路者不得已之爲耳聖人禮法之宗主而忍為之乎馬遷為野合之誣謂顏氏諱而不告鄭註因之以滋後世之惑且如

堯舜瞽瞍之事世俗不勝異論非孟子辭而闢之後
世謂何此經雜出諸子所記其間不可據以為實者
多矣孟子曰主癰疽與侍人瘠環何以為孔子愚亦
謂終身不知父墓何以為孔子乎其不然審矣此非
細故不得不辨

鄰有喪舂不相里有殯不巷歌

說見曲禮

喪冠不綏

冠必有笄以貫之以紃繫笄順頤而下結之曰纓垂其餘於前者謂之緌喪冠不緌蓋去飾也

有虞氏瓦棺夏后氏堅周殷人棺槨周人牆置翬

瓦棺始不衣薪也堅周或謂之土周聖者火之餘燼蓋治土為甗而四周於棺之坎也殷世始為棺槨周人又為飾棺之具蓋彌文矣牆柳衣也柳者聚也諸飾之所聚也以此障柩猶垣墻之障家故謂之牆翬如扇之狀有畫為黼者有畫為黻者有畫雲氣者多

寡之數隨貴賤之等

馬氏曰自虞氏瓦棺而至夏后氏聖周聖周有椁之象商人以

瓦棺聖周皆陶冶之器而陶冶出於土及其久也必復於土不能無使土親膚遂以木易之木足以勝土而仁人孝子所以深慮長思者未有易此聖人之法相待而後備故周人則緣商人之棺椁飾之以牆置嬰棺椁以比化牆置嬰以爲觀美皆所以盡孝子之心無使之惡於死而已

周人以殷人之棺椁葬長殤以夏后氏之聖周葬中殤下殤以有虞氏之瓦棺葬無服之殤

十六至十九為長殤十二至十五為中殤八歲至十一為下殤七歲以下為無服之殤生未三月不為殤

嚴陵方氏曰：槨之於棺，如城之有郭也。牆以帷柩而周圍如牆，娶以飾柩而翼蔽如羽蓋。世愈久而禮愈備，故也。長殤而下死者，愈少則禮愈殺也。

夏后氏尚黑，大事歛用昏，戎事乘驪，牲用玄。殷人尚白，大事歛用日中，戎事乘翰，牲用白。周人尚赤，大事歛用日出，戎事乘騂，牲用騂。

禹以治水之功得天下，故尚水之色。湯以征伐得天下，故尚金之色。周之尚赤，取火之勝金也。大事喪事也，騂黑色，翰白色，易曰：白馬翰如騂，赤馬而黑鬣尾。

也

穆公之母卒使人問於曾子曰如之何對曰申也聞諸申之父曰哭泣之哀齊斬之情饘粥之食自天子達布幕衛也繆幕魯也

穆公魯君申參之子也厚曰饘稀曰粥幕所以覆於殯棺之上衛以布為幕諸侯之禮也魯以綃為幕蓋

僭天子之禮矣

廣安游氏曰父母之喪貴賤不殊此所以自天子達也若幕則天子以綃

諸侯以布穆公苟欲行禮所謂賁賤一者固當一也所謂天子諸侯異者固當異也此二言喪禮盡矣且

禮文之制曾申獨舉幕而不舉
其他則其他推是而可知矣

晉獻公將殺其世子申生公子重耳謂之曰子蓋言子
之志於公乎世子曰不可公安驪姬是我傷公之心也
此事詳見左傳重耳申生異母弟即文公也蓋何不
也明其讒則姬必誅是使君失所安而傷其心也

曰然則蓋行乎世子曰不可君謂我欲弑君也天下豈
有無父之國哉吾何行如之

重耳又勸其奔他國而申生不從也何行如之言行

將何往也

使人辭於狐哭曰申生有罪不念伯氏之言也以至於死申生不敢愛其死雖然吾君老矣子少國家多難伯氏不出而圖吾君伯氏苟出而圖吾君申生受賜而死再拜稽首乃卒是以為恭世子也

狐哭申生之傅辭猶將去而告違蓋與之永訣也申生自經而死陷父於不義不得為孝但得諡恭而已
○疏曰註云伯氏狐哭別氏者狐是總氏伯仲是兄

弟之字字伯者謂之伯氏字仲者謂之仲氏故傳云

叔氏其忘諸乎又此文云叔氏專以禮許人是一

人之身字則別為氏也

長樂陳氏曰君子之於親有言以明已有諫以明事諫則

以幾為順以孰為勤幾而不入則至於孰孰而不入則至于號號而將至於見殺則又有義以逃之是雖于親有所不從而于義無所不順于親或不我愛而于鄉閭無所得罪此古之所謂孝子也彼不善事親者以小愛賊恩姑息賊德于已可以言而不言于事可以諫而不諫依違隱忍惟意是從以至殞身于其親之命而陷親于不義之名是將以安親而反危之將以悅親而反辱之此君子之所不取也晉獻公將殺其世子申生申生於親可言而不言而且懼傷公之心於義可逃而不逃而且謂天下豈有無父之國

以至忘其躬之不聞而且卹國家之多難不顧死生之大節而且謹再拜之末儀是恭而已非孝也春秋書晉侯殺其世子申生蓋書晉侯以明晉侯之無道書申生以明申生之罪也雖然春秋之時臣弑其君子弑其父如衛輒拒父而爭國楚商臣弑君而篡位則申生之行蓋可哀而恕之也孔子曰苟志於仁無惡也故禮不以申生爲不孝而以之爲恭猶詩不以叔壽爲不孝而以之爲不瑕也然以春秋禮義之法繩之則申生不足以及爲孝也

魯人有朝祥而莫歌者子路笑之夫子曰由爾責於人終無已夫三年之喪亦已久矣夫子路出夫子曰又多乎哉踰月則其善也

朝祥旦行祥祭之禮也朝祥莫歌固為非禮特以禮教衰廢之時而此人獨能行三年之喪故夫子抑子路之笑然終非正禮恐學者致疑故俟子路出乃正言之其意若曰名為三年之喪實則二十五月今已至二十四月矣此去可歌之日又豈多有日月乎哉但更踰月而歌則為善矣蓋聖人於此雖不責之以備禮亦未嘗許之以變禮也

長樂陳氏曰喪凶禮也祭吉禮也畢凶禮之喪

猶為吉祭之禮未全乎吉也吉事兆見於此矣得不謂之祥乎祥歌同日失之太速子路笑之失之太嚴

此孔子所以怒魯人而抑子路之責人無已也記曰
祥之日鼓素琴不爲非而歌則爲未善者琴自外作
歌曲中
出故也

魯莊公及宋人戰于乘丘縣賁父御卜國爲右馬驚敗
績公隊佐車授綏公曰宋之卜也縣賁父曰他日不敗
績而今敗績是無勇也遂死之圍人浴馬有流矢在白
肉公曰非其罪也遂誅之士之有誅自此始也

乘邱魯地戰在莊公十年縣卜皆氏也凡車右以勇
力者爲之大崩曰敗績公墜車而佐車授之綏以登

是登佐車也佐車副車也綏挽以升車之索也末之
卜者言卜國微末無勇也二人遂赴鬪而死圉人掌
馬者及浴馬方見流矢中馬股間之肉則知非二子
之罪矣生無爵則死無謚殷大夫以上為爵士雖周
爵卑不應謚莊公以義起遂誅其赴敵之功以為謚
焉。方氏曰誅之為義達善之實而不欲飾者也謚
則因誅之言而別之有誅則有謚矣

長樂陳氏曰春秋無義戰則莊

公乘邱之戰非義也流矢中馬而敗績非御與佐之
罪而罪之非智也以成德之誅而加之未成德之士

使與士喪同非禮也非義與智則貽害於一時非禮則亂法於萬世貽害於一時其罪小亂法於萬世其罪大記人即其罪大者記之故曰士之有誅自此始也

曾子寢疾病樂正子春坐於牀下曾元曾申坐於足童子隅坐而執燭

病者疾之甚也子春曾子弟子元與申曾子子也

童子曰華而睨大夫之簣與子春曰止曾子聞之瞿然曰呼曰華而睨大夫之簣與曾子曰然斯季孫之賜也我未之能易也元起易簣曾元曰夫子之病革矣不可

以變幸而至於旦請敬易之魯子曰爾之愛我也不如彼君子之愛人也以德細人之愛人也以姑息吾何求哉吾得正而斃焉斯已矣舉扶而易之反席未安而沒華者畫飾之美好眇者節目之平瑩簣簞也止使童子勿言也瞿然如有所驚也呼者嘆而噓氣之聲曰童子再言也革急也變動也彼謂童子也童子知禮以為曾子未嘗為大夫豈可卧大夫之簣曾子識其意故然之且言此魯大夫季孫之賜耳於是必欲易

之易之而沒可謂斃於正矣。朱子曰：易簣結纓，未
須論優劣，但看古人謹於禮法，不以死生之變易其
所守如此，便使人有行一不義、殺一不辜而得天下
不為之心。此是緊要處。又曰：季孫之賜曾子之受，皆
為非禮。或者因仍習俗，嘗有是事而未能正耳。但及
其疾病，不可以變之時，一聞人言而必舉扶以易之，
則非大賢不能矣。此事切要處，正在此毫釐頃刻之
間。

程子曰：人苟有朝聞道夕死可矣之志，則不肯
一日安於所不安也。何止一日須臾，不能如曾子。

易簣須要如此乃安人不能若此者只爲不見實理
實理者實見得是實見得非凡實理得之於心自別
若耳聞口道者心實不見若見得必不肯安於此○
龍泉葉氏曰曾子之學堅定明篤雖神已離形而不
變異死生若一致然且改過甚勇
以正為終是後學鑒照準程處也

始死充充如有窮既殯瞿瞿如有求而弗得既葬皇皇
如有望而弗至練而慨然祥而廓然

疏曰事盡理屈為窮親始死孝子匍匐而哭之心形
充屈如急行道極無所復去窮急之容也瞿瞿眼目
速瞻之貌如有所失而求覓之不得然也皇皇猶栖

栖也親歸草土孝子心無依託如有望彼來而彼不至也至小祥但慨歎日月若馳之速也至大祥則情意寥廓不樂而已。方氏曰下篇述顏丁之居喪則言皇皇於始死言慨焉於既葬問喪則言皇皇於反哭所言不同者蓋君子有終身之喪思親之心豈有隆殺哉先王制禮略爲之節而已故其所言不必同也

郝婁復之以矢蓋自戰於升陘始也

魯僖公二十一年與邾人戰於升陘魯地也邾師雖勝而死傷者多軍中無衣復者用矢釋云邾人呼邾聲曰婁故曰邾婁夫以盡愛之道禱祠之心孝子不能自己冀其復生也疾而死行之可也兵刃之下肝腦塗地豈有再生之理復之用矢不亦誣乎

魯婦人之髻而弔也自敗於臺鮎始也

古時以纚韜髮凶則去纚而露其髻故謂之髻狐鮎之戰在魯襄公四年蓋為邾人所敗也髻不以弔時

家家有喪故髻而相弔也。○方氏曰矢所以施於射

非所以施於復髻所以施於喪非所以施於弔因之

而弗改則非矣

廣安游氏曰先王之世雖用兵臨軍之際未有用禮者也且禮者行乎

其所以可行者也孔子曰殺人之中又有禮焉此古道也惟其以禮相與則兩軍交戰而殺有所止未有若後世極兵力所至至於僵尸百萬流血千里而後已者也故古者雖身膏草野之人與夫死者之家所謂喪弔之禮猶得行乎其間升陘以前未嘗無戰死者得復以衣而不復以矢臺鮑以前未嘗無戰死而相弔者得弔以衰而不髻則是殺人之甚必自升陘臺鮑二者始自是而遂以為常則再失之矣嗚呼自先王之禮廢而兵禍之烈至於六國秦漢之際殺入至以數十萬計天下塗炭肝腦塗地失國之禍至於如

此誠可嘆也大率先王之世至出於一而禮樂達乎天下凡所謂禮者行之廟堂至乎州巷達乎蒐狩用乎軍旅造次顛沛無非禮者生乎由是死乎由是上下小大相與習乎此而安乎此於兩軍之戰而殺有所止禮使然也後世不然其從容無事之時固已廢禮任其智力及夫軍旅死生之際苟可以自利而害人者豈復恤哉故古人殺有所止與後世異蓋禮之存亡故也於復以矢弔以鬻則知兵禍之甚烈記禮者記其失禮之甚也

南宮縚之妻之姑之喪夫子誨之髻曰爾母從從爾爾母扈扈爾蓋榛以為笄長尺而總八寸

縚妻夫子兄女也姑死夫子教之為髻從從高也扈

扈廣也言爾髻不可太高不可太廣又教以笄總之法笄即簪也吉笄尺二寸喪笄一尺斬衰之笄用箭竹竹之小者也婦為舅姑皆齊衰不杖期當用榛木為笄也束髮謂之總以布為之既束其本末而總之餘者垂於髻後其長八寸也

孟獻子禫縣而不樂比御而不入夫子曰獻子加於人一等矣

孟獻子魯大夫仲孫蔑也禫祭名禫者澹澹然平安

之意大祥後間一月而禫故云中月而禫或云祥月之中者非小記云中一以上而祔亦謂間一世也禮大夫判縣縣而不樂者但縣之而不作也比御而不入者雖比次婦人之當御者而猶不復寢也一說比及也親喪外除故夫子美之

長樂陳氏曰蓋三年之喪則久矣故祥月而禫

者以義斷恩也期之喪則近矣故間月而禫者以恩伸義也記曰禫而內無哭者樂作矣又曰禫而從御吉祭而復寢由此觀之孟獻子禫縣而不樂比御而不入則過乎此矣故孔子稱之今夫先王制禮以中為界子夏子張援琴於除喪之際孔子皆以為君子伯魚子路過哀於母姊之喪孔子皆非之然則孟獻

子過於禮孔子反稱之者非以為得禮也特稱其加諸人一等而已

孔子既祥五日彈琴而不成聲十日而成笙歌有子蓋既祥而絲屨組纓

有子孔子弟子有若也禮既祥白屨無絢縞冠素紕組之文五采今方祥即以絲為屨之飾以組為冠之纓服之吉者也此二者皆譏其變吉之速然蓋者疑辭恐記者亦是得於傳聞故疑其辭也引孔子之事者以見餘哀未忘也

李氏曰說而不樂比御而不入加于人者也絲屨組纓不及于

人者也同于人可也加于人則非中道矣及人可也
不及人非禮矣孔子篤于仁克之以禮五日彈琴而
不成聲仁也十日而成笙歌禮也有過不及然
后知其中故言孟獻子有若而言孔子于其中

死而不弔者三畏厭溺

方氏曰戰陳無勇非孝也其有畏而死者乎君子不
立巖牆之下其有厭而死者乎孝子舟而不游其有
溺而死者乎三者皆非正命故先王制禮在所不弔
。應氏曰情之厚者豈容不弔但其辭未易致耳若
為國而死於兵亦無不弔之理若齊莊公於杞梁之

妻未嘗不弔也。愚聞先儒言明理可以治懼見理不明者畏懼而不知所出多自經於溝瀆此真為死於畏矣似難專指戰陳無勇也或謂鬪狠亡命曰畏

廣安游氏曰古之君子欲正人之過失不專恃乎刑罰而已使生者有所愧死者有所憾皆所以誅罰之也生有所愧若異其衣冠之類死有所憾若死而不弔之類是也蓋禮樂行於天下使人有所勸勉愧恥而不麗於過惡此其為尊道而不迫亦後世所不能及也

子路有姊之喪可以除之矣而弗除也孔子曰何弗除也子路曰吾寡兄弟而弗忍孔子曰先王制禮行道之

人皆弗忍也子路聞之遂除之

行道之人皆有不忍於親之心然而遂除之者以先

王之制不敢違也

吳氏韋曰聖人以中道抑人之情非惡其過厚懼其不可繼而已○

臨川吳氏曰行道謂稍知率性之道而行之者其情必過厚故以禮制其情則皆有所不忍也伯魚於出母之喪期後當不哭矣而猶哭子路於嫁姊之喪大功服滿當除矣而猶不除皆情不過厚而於禮不可故夫子皆抑其過伯魚遂除之除其哭也子路遂除之除其服也

太公封於營丘比及五世皆反葬於周君子曰樂樂其所生禮不怠其本古之人有言曰狐死正丘首仁也

太公雖封於齊而留周為太師故死而遂葬於周子孫不敢忘其本故亦自齊而反葬於周以從先人之兆五世親盡而後止也樂生而敦本禮樂之道也生而樂於此豈可死而倍於此哉狐雖微獸邱其所窟藏之地是亦生而樂於此矣故及死而猶正其首以向邱不忘其本也倍本忘初非仁者之用心故以仁目之疏曰周公封魯其子孫不反葬於周者以有次子在周世守其采地春秋周公是也

長樂陳氏曰禮樂同出於

人心而仁者人也亦出於人心而已故人而不仁如
禮何人而不仁如樂何則禮樂之道不過章德報情
而反始也太公封於營邱比及五世皆反葬於周夫
豈偽為之哉行吾仁以全禮樂之道而已狐死猶正
邱首況仁人孝子乎

伯魚之母期而猶哭夫子聞之曰誰與哭者門人曰鯉
也夫子曰嘻其甚也伯魚聞之遂除之

伯魚之母出而死父在為母期而有禫出母則無禫
伯魚乃夫子為後之子則於禮無服期可無哭矣猶
哭夫子所以嘆其甚

廣安游氏曰天下之禮苟備其情而為禮則子路伯魚不知其

所終約其不及之情而為禮則原壤宰子不可以為訓故禮者通乎賢不肖而為之不可以過不可以不及也

舜葬於蒼梧之野蓋三妃未之從也季武子曰周公蓋祔

天子以四海為家南巡而崩故遂葬蒼梧之野

舜長妃娥皇無子次妃女英生商均次妃癸比生二女霄明燭光三妃後皆不從舜之葬此記者言合葬之事古人未有因引季武子之言謂自周公以來始

祔葬也書陟方乃死。○蔡氏曰史記舜崩於蒼梧之野孟子言卒於鳴條未知孰是今零陵九疑有舜冢云曾子之喪浴於爨室

士喪禮浴於適室無浴爨室之文舊說曾子以曾元辭易簣矯之以謙儉然反席未安而沒未必有言及此使果曾子之命為人子者亦豈忍從非禮而賤其親乎此難以臆說斷之當闕之以俟知者

大巧廢業或曰大功誦可也

業者身所習如學舞學射學琴瑟之類廢之者恐其
忘哀也誦者口所習稍暫為之亦可然稱或曰亦未

定之辭也

長樂陳氏曰業者弦歌羽籥之事誦者詩書禮樂之文大功廢業而誦可則大功而

上不特廢業而誦亦不可大功而下不特誦可而業亦不廢也康誥於父子則不戒之以弗念天顯於弟則戒之以其天性之厚者無事於戒天性之將薄者不可以不戒也禮不曰衰期廢業而曰大功廢業其意如此而已

子張病召申祥而語之曰君子曰終小人曰死吾今日
其庶幾乎

申祥子張子也終者對始而言死則漸盡無餘之謂也君子行成德立有始有卒故曰終小人與羣物同朽腐故曰死疾沒世而名不稱為是也子張至此亦

自信其近於君子也

長樂陳氏曰君子小人曰終曰死之別蓋言人生斯世當盡之

道君子之人人道既盡則其死也為能終其事故以終稱之若小人則無可盡之道只是形氣消盡故稱之曰死終以道言死以形言子張言庶幾者蓋以生平持身唯恐有不盡之道今至將沒幸其得以盡道而終故以為言亦猶曾子知免之意觀其將死喜幸之言足以見其平生恐懼之意正學者所當用力也

曾子曰始死之奠其餘閣也與

始死以脯醢醴酒就尸牀而奠於尸東當死者之肩使神有所依也閣所以度置飲食益以生時度閣上所餘脯醢為奠也

嚴陵方氏曰人之始死以禮則未暇從其新以情則未忍易其舊故

以閣上所餘脯醢以為奠也

曾子曰小功不為位也者是委巷之禮也子思之哭嫂也為位婦人倡踊申祥之哭言思也亦然

委曲也曲巷猶言陋巷細民居於陋巷不見禮儀而鄙朴無節文故譏小功不為位是曲巷中之禮也言

思子游之子申詳妻之昆弟也。○馬氏曰凡哭必為位者所以叙親踈恩紀之差。嫂叔疑於無服而不為位。故曰無服而為位者。惟嫂叔蓋無服者所以遠男女近似之嫌而為位者。所以篤兄弟內喪之親子思哭嫂為位。婦人倡踊以婦人有相為娣姒之義而不敢以己之無服先之也。至於申詳之哭言思亦如子思蓋非禮矣。妻之昆弟外喪也而既無服則不得為哭位之主矣。記曰妻之昆弟為父後者死哭之適室。

子為主袒免哭踊夫入門右由是言之哭妻之昆弟

以子為主異於嫂叔之喪也以子為主則婦人不當

倡踊矣

嚴陵方氏曰位者哭泣之位也親有遠近服有輕重不可以無辨故哭泣之際各為之位

焉洎乎周室之衰典籍多失而一時之禮或有小功不為位者此魯子所以譏之子思之哭嫂也為位以言無服之喪猶且為位則知小功不為位尤為非矣

古者冠縮縫今也衡縫故喪冠之反吉非古也

疏曰縮直也殷尚質吉凶冠皆直縫直縫者辟積禘少故一前後直縫之衡橫也周尚文冠多辟積不一

直縫但多作禭而并橫縫之若喪冠質猶踈辟而直縫是與吉冠相反時人因言古喪冠與吉冠反故記者釋之云非古也止是周世如此耳古則吉凶冠同直縫也

曾子謂子思曰伋吾執親之喪也水漿不入於口者七日子思曰先王之制禮也過之者俯而就之不至焉者跂而及之故君子之執親之喪也水漿不入於口者三日杖而後能起

三日中制也七日則幾於滅性矣有扶而起者有杖

而起者有面垢而已者

長樂陳氏曰先王制為喪親之禮其服衰止於三年其哭

泣止於三月其水漿不入於口止於三日蓋三日可以怠而食三月可以解而沐三年可以祥而除使過者俯而就之不至者跂而及之也若夫以親之恩為罔極吾之情為無窮猶其無窮之情而不節之以禮則在已者不可傳在人者不可繼是戕賊天下之人而禍於孝也此曾子所以不為子思取也樂正子春之母死五日而不食既而悔之況七日乎

曾子曰小功不稅則是遠兄弟終無服也而可乎

稅者日月已過始聞其死追而為之服也大功以上

則然小功輕故不稅曾子據禮而言謂若是小功之服不稅則再從兄弟之死在遠地者聞之恒後時則終無服矣其可乎。疏曰此據正服小功也小記曰

降而在緦小功者則稅之其餘則否

馬氏曰曾子於喪有過乎哀是

以疑於此然小功之服雖不必稅而稅之者蓋亦禮之所不禁也昔齊王子請欲為其母之喪孟子曰雖加一日愈於已推此則不稅而欲稅之者固可矣

伯高之喪孔氏之使者未至冉子攝束帛乘馬而將之孔子曰異哉徒使我不誠於伯高

攝貨也十箇為束每束五兩蓋以四十尺帛從兩頭
各卷至中則每卷二丈為一箇束帛是十箇二丈今
之五匹也乘馬四馬也徒空也伯高不知何人意必
與孔子厚者冉子知以財而行禮不知聖人之心則
于其誠不于其物也雖若自責之言而實則深責冉
子矣

長樂陳氏曰禮以誠為本誠以禮為文無本不立無文不行冉求足於藝而不足於禮足於藝

則知文不足於禮則不知本此所以攝束帛乘馬而擅行之也觀其益子華之粟謀顓臾之伐則其所擅行者豈特此哉是皆不足於禮之過也孔子曰冉求之藝文之以禮樂亦可以為成人矣

伯高死於衛赴於孔子孔子曰吾惡乎哭諸兄弟吾哭
諸廟父之友吾哭諸廟門之外師吾哭諸寢朋友吾哭
諸寢門之外所知吾哭諸野於野則已疏於寢則已重
夫由賜也見我吾哭諸賜氏遂命子貢為之主曰為爾
哭也來者拜之知伯高而來者勿拜也

告死曰赴與訃同已太也。馬氏曰兄弟出於祖而
內所親者故哭之廟父友聯於父而外所親者故哭
之廟門外師以成己之德而其親視父故哭諸寢友

以輔已之仁而其親視兄弟故哭諸寢門之外至於所知又非朋友之比有相趨者有相揖者有相問者有相見者皆泛交之者也孔子哭伯高以野為太疏而以子貢為主君子行禮其審詳於哭泣之位如此者是其所以表微者歟。方氏曰伯高之於孔子非特所知而已由子貢而見故哭於子貢之家且使之為主以明恩之有所由也為子貢而來則弔生之禮在子貢知伯高而來則傷死之禮在伯高或拜或不

拜凡以稱其情耳故夫子誨之如此。石梁王氏曰

為爾哭也來者一句

長樂陳氏曰禮生於人情之所未有君子制

義以稱情隆禮以循義則先王之禮所未有者皆可適於人情而制之也伯高之死孔子疑其所哭故謂兄弟者父祖之遺體則哭於廟父之同志則於廟門之外師成我者也故於寢朋友輔我者也故於寢門之外所知知我者也故於野伯高之於我以情則非所知以分則非師友其見我也由賜而已故哭諸賜氏蓋為子貢而來知生者也為伯高而來知死者也知生者弔而不傷則來者禮也故拜之知死者傷而不弔則來者非禮也故勿拜之哭於賜氏義也教子貢之拜不拜禮也

曾子曰喪有疾食肉飲酒必有草木之滋焉以為薑桂

之謂也

喪有疾居喪而遇疾也以其不嗜故加草木之味以
為薑桂之謂一句乃記者釋草木之滋亦或曾子稱

禮書之言而自釋之歟

嚴陵方氏曰薑者草之滋桂
者木之滋酒肉之外又有草

木之滋者亦慮
其不勝喪而已

子夏喪其子而喪其明曾子弔之曰吾聞之也朋友喪
明則哭之曾子哭子夏亦哭曰天乎予之無罪也曾子
怒曰商女何無罪也吾與女事夫子於洙泗之間退而

老於西河之上使西河之民疑女於夫子爾罪一也喪
爾親使民未有聞焉爾罪二也喪爾子喪爾明爾罪三
也而曰爾何無罪與子夏投其杖而拜曰吾過矣吾過
矣吾離群而索居亦已久矣

以哭甚故喪明也洙泗魯二水名西河子夏所居索
散也久不親友故有罪而不自知。張子曰子夏喪
明必是親喪之時尚強壯其子之喪氣漸衰故喪明
然而曾子之責安得辭也疑女於夫子者子夏不推

尊夫子使人疑夫子無以異於子夏非如曾子推尊
夫子使人知尊聖人也。方氏曰子夏不尊於師而
尊於已不隆於親而隆於子猶以為無罪此曾子所
以怒之也然君子以友輔仁子夏之至於三罪者亦

由離朋友之羣而散居之久耳以離羣故散居也

安廣

游氏曰古之人所以多君子者以教法之備而內外
交修之也其居室則父兄教之其居學則師教之而
平居則朋友教之惟其教之備也故其寡過而德易
以成曾子之責子夏稱其名女其人若父師焉曾子
不以為嫌子夏安受其責蓋曾子正己以律人愛人
以德而不以姑息君子之道固如此也後世處父兄

師長之位已不能教其子弟朋友之間相
諷以色辭相安以姑息非復古人之道矣

夫晝居於內問其疾可也夜居於外弔之可也是故君
子非有大故不宿於外非致齋也非疾也不晝夜居於
內

內者正寢之中外謂中門外也晝而居內似有疾夜
而居外似有喪。應氏曰致齋居內非在房闥之中

蓋亦端居深處於寗奧之內耳

廣安游氏曰古之君子未有不從事乎其

常者車服有常數作止有常度出處有常所苟變乎其常則必有故不然則不安乎流俗而為異者也故

難

古之人見其服飾而長少可知見其步武而尊卑可知察其人之居則人之得失可知皆由乎常而觀之高子臯之執親之喪也泣血三年未嘗見齒君子以為

子臯名柴孔子弟子○疏曰人涕淚必因悲聲而出

血出則不由聲也子臯悲無聲其涕亦出如血之出

故云泣血人大笑則露齒本中笑則露齒微笑則不

見齒

嚴陵方氏曰君子於此固不以為是然亦不可以為非特以為難而已經於喪有曰居有曰執

有曰為何也蓋以身言之則曰居以禮言之則曰執以事言之則曰為合而言之其實一也

衰與其不當物也寧無衰齊衰不以邊坐大功不以服
勤

疏曰物謂升縷及法制長短幅數也邊坐偏倚也喪服宜敬坐起必正不可著衰而偏倚也齊衰輕既不倚斬重不言可知大功雖輕亦不可著衰服而為勤勞之事也。馬氏曰衰不當物則亂先王之制而後世疑其傳無衰則禮雖不行而其制度定于一猶可以識之故曰與其不當物也寧無衰

山陰陸氏曰物若周書所謂朝

服八十物七十物是已據此布之精粗非獨升數不同縷數亦不同矣尊者服精卑者服粗故曰與其不當物寧無衰

孔子之衛遇舊館人之喪入而哭之哀出使子貢說驂而賻之子貢曰於門人之喪未有所說驂說驂於舊館無乃已重乎夫子曰予鄉者入而哭之遇於一哀而出涕予惡夫涕之無從也小子行之

舊館人舊時舍館之主人也駕車者中兩馬為服馮兩旁各一馬為驂馬遇一哀而出涕情亦厚矣情厚

者禮不可薄故解脫驂馬以為之賻凡以稱情而已
客行無他財貨故也惡夫涕之無從者從自也今若
不賻則是於死者無故舊之情而此涕為無自而出
矣惡其如此所以必當行賻禮也舊說孔子遇主人
一哀而出涕謂主人見孔子來而哀甚是以厚恩待
孔子故孔子為之賻然上文既曰入而哭之哀則又
何必迂其說而以為遇主人之哀乎

嚴陵方氏曰車馬曰賻貨財曰

賻此以馬而曰賻者以馬代貨故也

孔子在衛有送葬者而夫子觀之曰善哉為喪乎足以
爲法矣小子識之子貢曰夫子何善爾也曰其往也如
慕其反也如疑子貢曰豈若速反而虞乎子曰小子識
之我未之能行也

往如慕反如疑此孝子不死其親之至情也子貢以
為如疑則反遲不若速反而行虞祭之禮是知其禮
之常而不察其情之至矣夫子申言小子識之且曰
我未之能行則此豈易言哉

廬陵胡氏曰小子識之
我未之能行也善其哀

慕虞祭雖遲不害

顏淵之喪饋祥肉孔子出受之入彈琴而后食之

彈琴而後食者蓋以和平之聲散感傷之情也

嚴陵方氏

曰吉之先見者謂之祥祥必有祭祭必有肉饋祥肉則所以獻其吉也受之必彈琴則所以散其哀也
長樂陳氏曰祥祭而饋則鬼事畢而人事始矣顏淵之喪饋祥肉孔子出受之仁也必彈琴而後食之義也禮之道無他節文仁義而已矣

孔子與門人立拱而尚右二三子亦皆尚右孔子曰二

三子之嗜學也我則有姊之喪故也二三子皆尚左

吉事尚左陽也凶事尚右陰也此蓋拱立而右手在

上也

張子曰孔子與門人立拱而尚右是义手以右手在上也以其姊之喪必如此者是俄頃不忘

也以是知聖人之能敬二三子學之者恐此禮非三代所有直孔子自爲之耳如喪出母亦夫子自制○山陰陸氏曰二三子纖悉務學聖人如此蓋有不應學而學之者未有應學而不學者也

孔子蚤作負手曳杖消搖於門歌曰泰山其頽乎梁木其壞乎哲人其萎乎既歌而入當戶而坐子貢聞之曰泰山其頽則吾將安仰梁木其壞哲人其萎則吾將安放夫子殆將病也遂趨而入

作起也負手曳杖反手卻後以曳其杖也消搖寬縱
自適之貌泰山為衆山所仰梁木亦衆木所仰而放
者猶哲人為衆人所仰望而放效也

夫子曰賜爾來何遲也夏后氏殯於東階之上則猶在
阼也殷人殯於兩楹之間則與賓主夾之也周人殯於
西階之上則猶賓之也而丘也殷人也予疇昔之夜夢
坐奠於兩楹之間夫明王不興而天下其孰能宗予予
殆將死也蓋寢疾七日而沒

猶在阼猶賓之者孝子不忍死其親殯之於此示猶在阼階以為主猶在西階以為賓客也在兩楹間則是主與賓夾之故言與而不言猶也孔子其先宋人成湯之後故自謂殷人疇發語之辭昔之夜猶言昨夜也夢坐於兩楹之間而見饋奠之事知是凶徵者以殷禮殯在兩楹間孔子以殷人而享殷禮故知將死也又自解夢奠之占云今日明王不作天下誰能尊已而使南面坐于尊位乎此必殯之兆也自今觀

之萬世王祀亦其應矣

長樂陳氏曰聖人知夫身者天地之委形生者天地之委

和性命者天地之委順故視肝膽為楚越以死生為晝夜安其適來之時處其適去之順將迎無所形於外哀樂不能間於內又孰以幻滅為累哉此所以悟於將死之夢全於負手之忘形曳杖之忘物逍遙於自得之場以與天為徒也然安得忽然忘物而吉凶不與之同乎此所以有泰山梁木哲人之嗟歎口嚴陵方氏曰夏后氏殞於東階之上者示不忍賓之爾故曰則猶在阼也殷人殞於兩楹之間若將賓之矣故曰則與賓主夾之也周人殞於西階之上者則若賓之矣故曰則猶賓之也凡此者以其世漸文而殞死之所愈遠而已然孔子夢坐奠於兩楹之間乃知其將死者以殷人則宜享殷禮故也

孔子之喪門人疑所服子貢曰昔者夫子之喪顏淵若

喪子而無服喪子路亦然請喪夫子若喪父而無服

以後章二三子經而出言之此所謂無服蓋謂弔服加麻也疏云士弔服疑衰麻謂環經也五服經皆兩股惟環經一股後章從母之夫疏云凡弔服不得稱服。方氏曰若喪父而無服所謂心喪也

嚴陵方氏曰方孔子

之生也以子之喪處門人及其沒也門人以父之喪處孔子報施之理也學記曰師無當於五服五服弗得不親則師之於人豈小補哉故子貢於三年之外又築室於場獨居三年然後歸以恩尤所重故也噫世衰道微禮教不明乎天下其執親之喪不能三年者蓋有之矣而況於師乎

孔子之喪公西赤爲志焉飾棺牆置翣設披周也設崇殷也綢練設旒夏也

公西氏赤名字子華孔子弟子也。疏曰孔子之喪公西赤以飾棺槨夫子故爲威禮備三王之制以章明志識焉於是以素爲褚褚外加牆車邊置翣恐柩車傾虧而以繩左右維持之此皆周之制也其送葬乘車所建旌旗刻繒爲崇牙之飾此則殷制及綢承旌旗之竿以素錦於杠首設長尋之旒此則夏禮也

○詩虞業維樅疏云懸鐘磬之處以采色為犬牙其狀隆然謂之崇牙練素錦也緇布廣終幅長八尺旒

之制也

長樂陳氏曰顏淵之死門人欲厚葬之孔子以為不可子疾病子路使門人為臣孔子以

為欺天門人之葬孔子則飾牆置翬以至周披殷崇夏旒而二代之禮莫不兼用豈孔子之心乎蓋門人以孔子有所不可及之道故報之以人所不可行之禮是雖禮兼於三代蓋亦稱情以為文而已故子貢六年於其墓孟子不以為非門人三代之厚葬君子不以為過

子張之喪公明儀為志焉褚幕丹質蟻結于四隅殷士也

疏曰褚者覆棺之物若大夫以上其形似幄士則無
褚公明儀尊其師故特為褚不得為幄但似幕形故
云褚幕以丹質之布而為之也又於褚之四角畫虵
蟬之形交結往來故云蟻結于四隅此殷禮士葬飾
也長樂陳氏曰子張之喪公明儀為志不牆不巽畫
者以蟻而葬之以殷士之禮何也殷禮質周禮文
質則厚文則薄子張之時既甚文矣故門人從質以
救其弊此易小過用過乎儉孔子欲從先進之意也
記曰掘中雷而浴毀竈以綴足及葬毀宗踰行殷道
也學者行之則喪禮從殷孔子門之所尚也公西華之
喪孔子則異於此者蓋厚孔子
所以尊道儉子張所以趣時也

子夏問於孔子曰居父母之仇如之何夫子曰寢苦枕干不仕弗與共天下也遇諸市朝不反兵而鬪

不反兵者不反而求兵言恒以兵器自隨

曰請問居昆弟之仇如之何曰仕弗與共國銜君命而使雖遇之不鬪曰請問居從父昆弟之仇如之何曰不為魁主人能則執兵而陪其後

疏曰朝在公門之內閤人掌中門之禁兵器但不得入中門耳其大詢衆庶在臯門之內則得入也設朝

或在野外或在縣鄙鄉遂但有公事之處皆謂之朝
兵者亦謂佩刀以上不必要是矛戟也。方氏曰市
朝猶不反兵則無所往而不執兵矣。曲禮云兄弟之
讎不反兵此言遇之不鬪者彼據不仕者言之耳。

嚴陵

方氏曰寢苦則常以喪禮自處枕干則常以戎事自
防不仕則不暇事人而事事也弗與共天下則與不
共戴天同義市朝非戰鬪之處遇諸市朝猶不反兵
則無所往而不執兵矣由其恩之至重故其報之如
此仕弗與共國則雖事人而事事亦耻與之相遇也
衛君命而使遇之不鬪則不敢以私讐妨公事由其
恩殺於父母曲禮言交游之讐而不及從父昆弟此
言從父昆弟之讐而不及交游者蓋交游之讐猶不

同國則從父昆弟可知矣於從父昆弟且不為魁則交游不為魁可知矣

孔子之喪二三子皆經而出羣居則經出則否

弔服加麻者出則變之今出外而不免經所以隆師也羣者諸弟子相為朋友之服也儀禮註云朋友雖無親有同道之恩相為服總之經帶亦弔服也故出則免之

山陰陸氏曰二三子蓋謂七十子知師之深者也

易墓非古也

疏曰易謂芟治草木不使荒穢古者殷以前墓而不

墳不易治也

子路曰吾聞諸夫子喪禮與其哀不足而禮有餘也不若禮不足而哀有餘也祭禮與其敬不足而禮有餘也不若禮不足而敬有餘也

有其禮而無其財則禮或有所不足哀敬則可自盡

也此夫子反本之論亦寧儉寧戚之意

臨川吳氏曰
哀敬言其心

禮之本也禮言其物禮之文也禮有本有文本固為
重然謂之與其謂之不若此矯世救弊之辭蓋本與
文兩相稱者
為盡善也

曾子弔於負夏主人既祖填池推柩而反之降婦人而
后行禮從者曰禮與曾子曰夫祖者且也且胡爲其不
可以反宿也

劉氏曰負夏衛地也葬之前一日曾子往弔時主人
已祖奠而婦人降在兩階之間矣曾子至主人榮之
遂徹奠推柩而反向內以受弔示死者將出行遇賓
至而為之暫反也亦事死如事生之意然非禮矣柩
既反則婦人復升堂以避柩至明日乃復還柩向外

降婦人於階間而後行遣奠之禮故從者見柩初已遷而復推反之婦人已降而又升堂皆非禮故問之而曾子答之云祖者且也是且遷柩為將行之始未是實行又何為不可復反越宿至明日乃還柩遣奠而遂行乎疏謂其見主人榮已不欲指其錯失而給說答從者此以衆人之心窺大賢也事之有無不可知其義亦難強解或記者有遺誤也所以徹奠者奠在柩西欲推柩反之故必先徹而後可旋轉也婦人

降階間亦以奠在車西故立車後今柩反故亦升避也

從者又問諸子游曰禮與子游曰飯於牖下小歛於戶內大歛於阼殯於客位祖於庭葬於墓所以即遠也故喪事有進而無退曾子聞之曰多矣乎予出祖者

從者疑曾子之言故又請問於子游也飯於牖下者尸沐浴之後以米及貝實尸之口中也時尸在西室牖下南首也士喪禮小歛衣十九稱大歛三十稱歛

者包裏歛藏之也小歛在戶之內大歛出在東階末
忍離其為主之位也主人奉尸歛於棺則在西階矣
掘肆於西階之上肆陳也謂陳尸於坎也置棺於肆
中而塗之謂之殯及啓而將葬則設祖奠於祖廟之
中庭而後行自牖下而戶內而阼而客位而庭而墓
皆一節遠於一節此謂有進而往無退而還也豈可
推柩而反之乎多矣乎予出祖者多猶勝也曾子聞
之方悟已說之非乃言子游所說出祖之事勝於我

之所說出祖也

嚴陵方氏曰飯即舍也。以用米故謂之飯舍。亦兼用珠玉而此不言者止。

據士禮也。歛以收歛其尸為義。其禮見喪大記。以衣衾之數有多少故有小大之名也。殯以饋於外祖。以祭於行葬以藏於野。自飯至葬其所愈遠。以義繼恩。故有進而無退。然負夏之喪既祖而填池矣。以曾子之弔遂推柩而反之降婦人而後行禮。此從者所以疑其非禮也。夫祖固有且意以祭於行。始方來有繼。故爾而曾子遂以為可以反宿則非也。降婦人而後行遣奠之禮。固禮之常。以其反柩而後降故為非。自飯於牖下至塋於墓與坊記所言皆同。

曾子襲裘而弔。子游裼裘而弔。曾子指子游而示人曰：「夫夫也，為習於禮者如之何其裼裘而弔也？」主人既小。

斂袒括髮子游趨而出襲裘帶經而入曾子曰我過矣
我過矣夫夫是也

疏曰凡弔喪之禮主人未變服之前弔者吉服吉服
者羔裘玄冠緇衣素裳又袒去上服以露裼衣此裼
裘而弔是也主人既變服之後弔者雖著朝服而加
武以經武吉冠之卷也又掩其上服若是朋友又加
帶此襲裘帶經而入是也。方氏曰曾子徒知喪事
為凶而不知始死之時尚從吉此所以始非子游而

終善之也

子夏既除喪而見予之琴和之而不和彈之而不成聲作而曰哀未忘也先王制禮而弗敢過也子張既除喪而見予之琴和之而和彈之而成聲作而曰先王制禮不敢不至焉

均為除喪而琴有和不和之異者蓋子夏是過之者俯而就之出於勉強故餘哀未忘而不能成聲子張是不至者跂而及之故哀已盡而能成聲也

李氏曰先王制

禮正之以中而使有餘者不敢盡不及者不敢不勉
要之不出於聖人之大閑而已子夏過者也不敢不
約之以禮故曰不敢過也子張不及者也不敢不引
而至於禮故曰不敢不至焉○嚴陵方氏曰四制曰
祥之日鼓素琴示民有終也蓋先王之制禮如此故
二子之除喪而見所以孔子各予之琴也○山陰陸
氏曰師也過商也不及今其
除喪如此蓋學之之力也

司寇惠子之喪子游為之麻衰壯麻經文子辭曰子辱
與彌年之弟游又辱為之服敢辭子游曰禮也

惠子衛將軍文子彌年之弟惠子廢適子虎而立庶
子故子游特為非禮之服以譏之亦檀弓免公儀仲

子之意也麻衰以吉服之布為衰也牡麻經以雄麻為經也麻衰乃吉服十五升之布輕於弔服弔服之經一股而環之今用牡麻絞經與齊衰經同矣鄭注云重服指經而言也文子初言辱為之服敢辭者辭其服也

文子退反哭子游趨而就諸臣之位文子又辭曰子辱與彌牟之弟游又辱為之服又辱臨其喪敢辭子游曰固以請文子退扶適子南面而立曰子辱與彌牟之弟

游又辱為之服又辱臨其喪虎也敢不復位子游趨而就客位

次言敢辭者辭其立於臣位也此時尚未喻子游之意及子游言固以請則文子覺其譏矣於是扶適子正喪主之位焉而子游之志達矣趨就客位禮之正也○疏曰大夫之賓位在門東近北家臣位亦在門東而南近門並皆北向

長樂陳氏曰司冠惠子之喪其廢嫡也無異公儀仲子之

立庶子游之於司冠惠子相友也無異檀弓之於公儀仲子檀弓之譏仲子服免而已趨而就門右而已

子游之譏惠子服不以免而麻衰牡麻經趨不就門
右而就諸臣之位又檀弓之譏則見於言子游之譏
至於無言者蓋檀弓以仲子無賢兄弟非可追而正
之故服止於免趨止於景伯而示之以言姑以正法
而已子游以惠子之兄弟有文子者可以追而正之
故重為之服卑為之趨示之以無言使之自訟而改
焉既而文子果扶適子南面而立豈非事異則禮異
哉然子游之知禮未必不始於檀弓故仲子之事子
游惑而檀弓行之
檀弓所以為賢歟

將軍文子之喪既除喪而後越人來弔主人深衣練冠
待於廟垂涕洟子游觀之曰將軍文氏之子其庶幾乎
亡於禮者之禮也其動也中

將軍文子即彌年也主人文子之子也禮無弔人於除喪之後者亦無除喪後受人之弔者深衣吉凶可以通用小祥練服之冠不純吉亦不純凶廟者神主之所在待而不迎受弔之禮也不哭而垂涕哭之時已過而哀之情未忘也庶幾近也子游善其處禮之變故曰文氏之子其近於禮乎雖無此禮而為之禮其舉動皆中節矣。疏曰深衣即間傳所言麻衣也制如深衣緣之以布曰麻衣緣之以素曰長衣緣之

以采曰深衣練冠者祭前之冠若祥祭則縞冠也始死至練祥來弔是有文之禮祥後來弔是無文之禮言文氏之子庶幾堪行乎無於禮文之禮也動舉也

中當於禮之變節也

長樂陳氏曰喪已除而弔始至非喪非無喪之時也深衣練冠

非凶非不凶之服也待于廟非受弔非不受弔之所也文子於其非喪非無喪之時能處之以非喪非無喪之禮故子游曰其庶幾乎亡於禮者之禮也其動也中中者猶射之有中中也中乎有於禮者之禮未足以為善中乎亡於禮者之禮則善矣

幼名冠字五十以伯仲死謚周道也

疏曰凡此之事皆周道也又殷以上有生號仍為死
後之稱更無別諡堯舜禹湯之例是也周則死後別
立諡。朱子曰儀禮賈公彥疏云少時便稱伯某甫
至五十乃去某甫而專稱伯仲此說為是如今人於
尊者不敢字之而曰幾丈之類

石林葉氏曰子生三月而父名之非特父

名之人亦名之也至冠則成人矣非特人不得名父亦不名焉故加之字而不名所以尊名也五十為大夫則益尊矣有位於廟非特人不字父與君亦不字焉故但曰伯仲而不字所以尊字也禮固自有次第或言士冠禮既冠而字曰伯某甫仲叔季惟其所當則固已稱伯仲何待於五十疑祖弓之誤此不然始

冠而字者伯仲皆在上此但以其序次之所以為字者在下某甫也如伯牛仲弓叔肸季友之類是已至於五十為大夫尊其為某甫者則去之故但言伯仲而冠之以氏伯仲皆在下如召伯南仲榮叔南季之類是也檀弓言伯仲者非加之伯仲也去其為某甫者而言伯仲爾

經也者實也

麻在首在要皆曰經分言之則首曰經要曰帶經之言實明孝子有忠實之心也首經象緇布冠之缺項要經象大帶又有絞帶象革帶齊衰以下用布○朱子曰首經大一搯是拇指與第二指一圍要經較小

絞帶又小於要經要經象大帶兩頭長垂下絞帶象革帶一頭有羈子以一頭串於中而束之

掘中雷而浴毀竈以綴足

疏曰中雷室中也死而掘室中之地作坎以牀架坎上尸於牀上浴令浴汁入坎也死人冷強足辟戾不可著屨故用毀竈之甕連綴死人足令直可著屨也及塋毀宗躡行出于大門殷道也學者行之

疏曰毀宗毀廟也殷人殯於廟至塋柩出毀廟門西

邊牆而出于大門行神之位在廟門西邊當所毀宗
之外生時出行則為壇幣告行神告竟車躐行壇上
而出使道中安隱如在壇今向毀宗廟處出仍得躐
行此壇如生時之出也學於孔子者行之效殷禮也

嚴陵方氏曰經之所用男子重首婦人重腰皆用其
所重非徒為虛名而已古者復穴而居開其上以取
明而雨溜焉故後世因以名其室毀竈取甍以綴於
足而欲尸之溫也夫中雷則生時於之以居處浴必
掘中雷以示不復居處於此故也而竈則生時於之
以烹飪綴足必毀竈以示不復烹飪於此故也宗則
生時於之以祭享躐行必毀宗以示不復祭享於此
故也凡此皆殷所常行殷尚質故禮之所由本周尚

文故禮之所由備生以文為尚故名字之制學禮者行乎周道焉死以質為尚故喪葬之制學禮者行乎

商道焉

子柳之母死子碩請具子柳曰何以哉子碩曰請粥庶弟之母子柳曰如之何其弔人之母以葬其母也不可既葬子碩欲以賻布之餘具祭之子柳曰不可吾聞之也君子不家於喪請班諸兄弟之貧者

子柳魯叔仲皮之子子碩之兄也具謂喪事合用之器物也何以哉言何以為用乎謂無其財也鄭云粥

謂嫁之也妾賤取之曰買布錢也不家於喪惡因死者而為利也班猶分也不粥庶弟之母者義也班兄弟之貧者仁也夫以粥庶母以治葬則乏於財可知矣而不家於喪之言確然不易古人之安貧守禮蓋如此嚴陵方氏曰無財不可以為悅豈宜粥人之母以葬其親乎無田祿者不設祭器豈宜以賻布之餘具之乎此子柳所以不從子碩之請也

君子曰謀人之軍師敗則死之謀人之邦邑危則亡之應氏曰衆死而義不忍獨生焉得而不死國危而身

不可獨存焉得而不亡

長樂陳氏曰主危臣辱主辱臣死故謀人之軍師敗則死

之社稷存則與存社稷亡則與亡故謀人之邦邑危則亡之思其敗之死則無輕軍師思其危之亡則無輕邦邑先王懼夫為人臣者不知出此故禮以戒之凡使引惡執咎殫忠致命而已

公叔文子升於瑕邱蘧伯玉從文子曰樂哉斯邱也死則我欲葬焉蘧伯玉曰吾子樂之則瑗請前

二子皆衛大夫文子名拔伯玉名瑗。劉氏曰伯玉之請前蓋始從行於文子之後及聞文子之言而惡其將欲奪人之地自為身後計遂譏之曰吾子樂此

則我請前行以去子矣示不欲與聞其事也可謂長

於風喻者矣

嚴陵方氏曰塋死為禮蓋生者之所送終非死者之所豫擇擇之且不可又況

猶己之樂而忘人之害乎苟惟樂已害人之事可為則夫人而為之矣此公叔文子樂瑕邱之葬故蘧伯王有請前之譏也

弁人有其母死而孺子泣者孔子曰哀則哀矣而難為繼也夫禮為可傳也為可繼也故哭踊有節

弁地名孺子泣者其聲若孺子無長短高下之節也聖人制禮期於可傳可繼故哭踊皆有其節若無節

則不可傳而繼矣

嚴陵方氏曰傳言由己以傳於後繼言使人有繼於前孟子曰舜為

法於天下可傳於後世又曰君子創業垂統為可繼也此傳繼之辨歟夫弁人之喪母泣若孺子雖為盡哀然夫哭踊之節而難為繼矣此孔子以是言之也

叔孫武叔之母死既小斂舉者出尸出戶袒且投其冠
括髮子游曰知禮

禮始死將斬衰者并纓將齊衰者素冠小斂畢而徹
帷主人括髮袒于房婦人髻于室舉者出舉尸以出
也括髮當在小斂之後尸出堂之前主人為將奉尸

故袒而括髮耳今武叔待尸出戶然後袒而去冠括髮失禮節矣故註以子游知禮之言為嗤之也。馮

氏曰經文作戶出戶上戶字乃尸字之訛也鄭註云

尸出戶乃變服義甚明然註文尸亦訛為戶遂解不

通

嚴陵方氏曰蓋小斂而後袒括髮則得其序矣出尸而後袒括髮則非其所也子游曰知禮所以甚

言其不知禮也

扶君卜人師扶右射人師扶左君薨以是舉

君疾時僕人之長扶其右體射人之長扶其左體此

二人皆平日贊正服位之人故君既薨遇遷尸則仍用此人也方氏釋師為衆應氏以卜人為卜筮之人

廣安游氏曰傳曰男子不死於婦人之手春秋書人君不薨於路寢則為死不以道故君子疾也以在寢在朝之正服位而從君者扶持之薨則外廷之人共治其喪疾則外廷之人共知其疾所以防微杜漸致謹於疾病之際以正其死道也然此非一日之故蓋古者之制婦官序于內而人君哀樂之事得其節僕人射人舉職於外而人君起居之節得其宜故九嬪世婦之屬掌以時御叙于王所宮中之始總以太宰參以六卿人君出入起居常從事於禮故疾病死喪內之人不得與焉此非承先王積習而當時禮教之隆有不能然者也

從母之夫舅之妻二夫人相爲服君子未之言也或曰
同爨總

從母母之姊妹舅母之兄弟從母夫於舅妻無服所
以禮經不載故曰君子未之言時偶有甥至外家見
此二人相依同居者有喪而無文可據於是或人為
同爨總之說以處之此亦原其情之不可已而極禮
之變焉耳。或問從母之夫舅之妻皆無服何也朱
子曰先王制禮父族四故由父而上為族曾祖父總

麻姑之子姊妹之子女子子之子皆由父而推之也
母族三母之父母之母母之兄弟恩止於舅故從母
之夫舅之妻皆不為服推不去故也妻族二妻之父
妻之母乍看似乎雜亂無紀子細看則皆有義存焉
喪事欲其縱縱爾吉事欲其折折爾故喪事雖遽不陵
節吉事雖止不怠故騷騷爾則野鼎鼎爾則小人君子
蓋猶猶爾

縱縱給於趨事之貌折折從容中禮之貌喪事雖急

遽而不可陵躐其節次吉事雖有立而待事之時而不可失於怠惰若騷騷而太疾則鄙野矣鼎鼎而太舒則小人之為矣猶猶而得緩急之中君子行禮之道也

廣安游氏曰君子處吉凶之際以失禮為懼故疾舒之際常得其中○臨川吳氏曰喪事欲疾

吉事欲舒疾者雖當促遽然亦不可太急而陵越節次舒者雖有止息然亦不可太緩而怠惰寬縱故騷騷而急疾不節則若田野之人鼎鼎而舒緩怠惰則若不修整之小人唯君子得疾舒之中則於喪事不至太疾吉事不至太舒也

喪具君子恥具一日二日而可為也者君子弗為也

喪具棺衣之屬君子恥於早為之而畢具者嫌不以久生期其親也然六十歲制七十時制八十月制九十日修蓋慮夫倉卒之變也一日二日可辦之物則君子不豫為之所謂絞紼衾冒死而後制者也

喪服兄弟之子猶子也蓋引而進之也嫂叔之無服也蓋推而遠之也姑姊妹之薄也蓋有受我而厚之者也方氏曰兄弟之子雖異出也然在恩為可親故引而進之與子同服嫂叔之分雖同居也然在義為可嫌

故推而遠之不相為服姑姊妹在室與兄弟姪皆不杖期出適則皆降服大功而從輕者蓋有受我者服為之重故也言其夫受之而服為之杖期以厚之故於本宗相為皆降一等也

何氏平叔曰男女相為服之異也嫂叔親非骨肉尊卑不異恐有混淆之失故推使無服也

食於有喪者之側未嘗飽也

應氏曰食字上疑脫孔子字

嚴陵方氏曰飢而廢事飽而忘哀皆非禮也慮

其至於廢事故雖喪者之側必食又慮其忘哀故未嘗飽焉是禮也雖聖人之行不過如此而已

曾子與客立於門側其徒趨而出曾子曰爾將何之曰
吾父死將出哭於巷曰反哭於爾次曾子北面而弔焉
其徒門弟子也次其所寓之館舍也士喪禮主人

西面賓在門東北面此曾子所以北面而弔之也

臨川

吳氏曰曰吾父死者
立於門側之客曰也

孔子曰之死而致死之不仁而不可爲也之死而致生
之不知而不可爲也是故竹不成用瓦不成沫木不成
斲琴瑟張而不平竽笙備而不和有鐘磬而無簨簴其

曰明器神明之也

劉氏曰之往也之死謂以禮往送於死者也往於死者而極以死者之禮待之是無愛親之心爲不仁故不可行也往於死者而極以生者之禮待之是無燭理之明爲不知故亦不可行也此所以先王為明器以送死者竹器則無滕緣而不成其用瓦器則麗質而不成其黑光之沫木器則樸而不成其雕斲之文琴瑟則雖張絃而不平不可彈也箏笙雖備具而不

和不可吹也。雖有鐘磬而無懸挂之簨簠，不可擊也。凡此皆不致死，亦不致生，而以有知無知之間待死者，故備物而不可用也。備物則不致死，不可用則亦

不致生，其謂之明器者，蓋以神明之道待之也。

長樂陳氏

曰：不曰神明之器，特曰明器者，以神之幽不可不明，故也。周官凡施於神者，皆曰明。故水曰明，水曰明，火曰明，火以至明，燭明，寘者皆神明之也。蓋其有竹瓦木之所用，琴瑟、笙、鐘、磬之所樂者，明之也。所用非所用，所樂非所樂，神之也。宋襄公葬其夫人，醯醢百甕，豈知此哉。

有子問於曾子曰：「問喪於夫子乎？」曰：「聞之矣。喪欲速貧，

死欲速朽有子曰是非君子之言也曾子曰參也聞諸夫子也有子又曰是非君子之言也曾子曰參也與子游聞之有子曰然然則夫子有為言之也曾子以斯言告於子游子游曰甚哉有子之言似夫子也昔者夫子居於宋見桓司馬自為石槨三年而不成夫子曰若是其靡也死不如速朽之愈也死之欲速朽為桓司馬言之也

仕而失位曰喪桓司馬即桓魋靡侈也

南宮敬叔反必載寶而朝夫子曰若是其貨也喪不如速貧之愈也喪之欲速貧爲敬叔言之也

敬叔魯大夫孟僖子之子仲孫閱也嘗失位去魯後得反載寶而朝欲行賂以求復位也

曾子以子游之言告於有子有子曰然吾固曰非夫子之言也曾子曰子何以知之有子曰夫子制於中都四寸之棺五寸之槨以斯知不欲速朽也昔者夫子失魯司寇將之荆蓋先之以子夏又申之以冉有以斯知不

欲速貧也

定公九年孔子為中都宰制棺槨之法制也四寸五

寸厚薄之度將適楚而先使二子繼往者蓋欲觀楚

之可仕與否而謀其可處之位歟

嚴陵方氏曰肆其侈心而至於傷財

魯不若速朽之為愈也肆其利心而至於害義魯不若速貧之為愈也孔子之言特為二子而發爾有子乃能以中都與之荆之事驗之可謂知音者矣

陳莊子死赴於魯魯人欲勿哭繆公召縣子而問焉縣子曰古之大夫束修之問不出竟雖欲哭之安得而哭

之

大君訃於他國之君曰君之外臣寡大夫某死莊子
齊大夫名伯齊強魯弱不容略其赴縣子名知禮故
召問之修脯也十脰為束問遺也為人臣者無外交
不敢貳君也故雖束修微禮亦不以出竟

今之大夫交政於中國雖欲勿哭焉得而勿哭且臣聞
之哭有二道有愛而哭之有畏而哭之公曰然然則如
之何而可縣子曰請哭諸異姓之廟於是與哭諸縣氏

交政於中國言當時君弱臣强大夫專盟會之事以
與國君相交接也此變禮之由也愛之哭出於不能
已畏之哭出於不得已哭伯高於賜氏義之所在也
哭莊子於縣氏勢之所迫也

嚴陵方氏曰君弱臣强有至交政於中國豈特

束修之間而已生既畏之而不敢不與之交則死亦
畏之而不敢不為之哭矣若魯人之哭陳莊子所謂
畏而哭之者也然縣子謂哭諸異姓之廟者以哭其
非所當哭之人故哭於非所當哭之廟也異姓之廟
必哭諸縣氏以其禮之所由起故爾則與哭伯高於
賜氏同義也○臨川吳氏曰愛而哭之謂哀死而哭
哭其所當哭也畏而哭之則哭死而非其情
哭所不當哭者也此衰世之事古豈有是哉

仲憲言於曾子曰夏后氏用明器示民無知也殷人用祭器示民有知也周人兼用之示民疑也曾子曰其不然乎其不然乎夫明器鬼器也祭器人器也夫古之人胡為而死其親乎

仲憲孔子弟子原憲也示民無知者使民知死者之無知也為其無知故以不堪用之器送之為其有知故以祭器之可用者送之疑者不以為有知亦不以為無知也然周禮惟大夫以上得兼用二器士惟用

鬼器也曾子以其言乃曰其不然乎再言之者甚不然之也蓋明器祭器固是人鬼之不同夏殷所用不同者各是時王之制文質之變耳非謂有知無知也若如憲言則夏后氏何為而忍以無知待其親乎○

石梁王氏曰三代送葬之具質文相異故所用不同其意不在於無知有知及示民疑也仲憲之言皆非曾子非之末獨譏其說夏后明器蓋舉其失之甚者也

嚴陵方氏曰明器祭器三代之所兼用蓋處之以死生之間而已豈特周而然哉而原憲必以夏用鬼器

殷用人器則是夏有致死之不仁殷有致生之不知矣宜乎曾子不然其說也然曾子之言止及於夏而不及於殷者以死其親尤君子之所不忍故也

公叔木有同母異父之昆弟死問於子游子游曰其大功乎狄儀有同母異父之昆弟死問於子夏子夏曰我未之前聞也魯人則為之齊衰狄儀行齊衰今之齊衰狄儀之問也

公叔木衛公叔文子之子同父母之兄弟期則此同母而異父者當降而為大功也禮經無文故子游以

疑辭答之魯人齊衰三月之服行之久矣故子夏舉以答狄儀而記者云因狄儀此問而今皆行之也此

記二子言禮之不同○鄭氏曰大功是

張子曰同母異父之昆弟

狄儀服之齊衰是與親兄弟之服同如此則無分別○嚴陵方氏曰禮異父亦謂之繼父繼父同居則服期焉服其父以期則其子相為服以大功乃其稱也而子夏遂以魯人之事告狄儀使之行齊衰不亦甚乎

子思之母死於衛柳若謂子思曰子聖人之後也四方於子乎觀禮子蓋慎諸子思曰吾何慎哉吾聞之有其

禮無其財君子弗行也有其禮有其財無其時君子弗行也吾何慎哉

柳若衛人伯魚卒其妻嫁於衛有其禮謂禮所得為者然無財則不可為禮時為大有禮有財而時不可

為則亦不得為之也

嚴陵方氏曰無其財則物不足以行禮無其時則勢不可以行

禮禮有常時有變財有限三者不備君子所不行也孟子所言不得不可以為悅者時與禮也無財不可以為悅者即此所謂財也
口廣安游氏曰為嫁母服此後世之禮非先王之正也子思之意以為雖有齊衰期之禮然財不足以備禮則行之必有所不備若有其禮有其財可以行矣而非道隆之時亦弗可以

備行也。以此觀之子思於嫁母之服，蓋有行之而不備者矣。古之君子嚴於父母，男女之別以爲禽犢懷母不懷父，君子惡之。故父在爲母期，以厭降於父母出嫁而其禮之行有所不備，以爲母絕於父，其尊統於父，所以致謹於父之親也。若厚於嫁母而於父不親，此禽犢之道，謹於禮者之所畏也。然後世君子行不如子思道，又不如子思未必能親其父而先絕其母。此又君子所難言也。故曰：與其過乎薄，寧過乎厚。去古既遠，行禮者當以是爲心。

縣子瑣曰：吾聞之古者，不降上下，各以其親。滕伯文爲孟虎齊衰其叔父也，爲孟皮齊衰其叔父也。

縣子名瑣。○疏曰：古者殷時也。周禮以貴降賤，以適

降庶惟不降正耳而殷世以上雖貴不降賤也上下各以其親不降之事也上謂旁親族曾祖從祖及伯叔之班下謂從子從孫之流彼雖賤不以己尊降之猶各隨本屬之親輕重而服之故云上下各以其親滕國之伯名文爲孟虎著齊衰之服者虎是文之叔父也又爲孟皮著齊衰之服者文是皮之叔父也言滕伯上爲叔父下爲兄弟之子皆著齊衰也

朱子曰夏殷而

上大槩只是親親長長之意到得周來則人添得許多貴貴底禮數如始封之君不臣諸父昆弟封君之

子不臣諸父而臣昆弟期之喪天子諸侯絕大夫降然諸侯大夫尊同則亦不絕不降姊妹嫁諸侯者則亦不絕不降此皆貴貴之義上世想皆簡略未有許多降殺貴貴底禮數凡此皆天下之大經前世所未備到得周公搜剔出來立為定制更不可易

后木曰喪吾聞諸縣子曰夫喪不可不深長思也買棺外內易我死則亦然

后木魯孝公子惠伯輩之後。馮氏曰此條重在不可不深長思一句買棺之時外內皆要精好此是孝子當為之事非是父母豫所屬託而曰我死則亦然

記禮者譏失言也

嚴陵方氏曰子思曰喪三日而殯凡附於身者必誠必信勿之有悔

焉耳矣三月而葬凡附於棺者必誠必信勿之有悔焉耳矣此喪所以不可不深長思也買棺外內易亦

其一

端耳

曾子曰尸未設飾故帷堂小斂而徹帷仲梁子曰夫婦方亂故帷堂小斂而徹帷

始死去死衣用斂衾覆之以俟浴既復之後揆齒綴足畢具脯醢之奠事雖小定然尸猶未襲斂也故曰未設飾於是設帷於堂者不欲人褻之也故小斂畢

乃徹帷仲梁子謂夫婦方亂者以哭位未定也二子

各言禮意鄭云斂者動搖尸帷堂為人褻之言方亂

非也仲梁子魯人

嚴陵方氏曰人死斯惡之矣以未設飾故帷堂蓋以欲人之所惡也

小斂則既設飾矣故徹帷焉若是則帷堂之禮為死者爾豈為生者哉而仲梁子以謂夫婦方亂故帷堂則失禮之意遠矣

小斂之奠子游曰於東方曾子曰於西方斂斯席矣小斂之奠在西方魯禮之未失也

疏曰儀禮小斂之奠設於東方奠又無席魯之衰末

奠於西方而又有席曾子見時如此將以為禮故云
小斂於西方斯此也其斂之時於此席上而設奠矣
故記者正之云小斂之奠所以在西方是魯人行禮
末世失其義也。今按儀禮布席于戶內註云有司
布斂席也在小斂之前及陳大斂衣奠則云奠席在
饌北斂席在其東註云大斂奠而有席彌神之也據
此則小斂奠無席

嚴陵方氏曰萬物生於東而死於西小斂之奠於東方則孝子未忍

死其親之意也

縣子曰綌衰總裳非古也

方氏曰葛之麗而卻者謂之綌布之細而疎者謂之總五服一以麻各有升數若以綌為衰以總為裳則取其輕涼而已非古制也

子蒲卒哭者呼減子臯曰若是野哉哭者改之

減子蒲之名也復則呼名哭豈可呼名也野哉言其鄙野而不達於禮也子臯孔子弟子高柴

杜橋之母之喪官中無相以爲沽也

疏曰沽麗略也孝子喪親悲迷不復自知禮節事儀皆須人相導而杜橋家母死宮中不立相侍故時人謂其於禮為麗略也

夫子曰始死羔裘玄冠者易之而已羔裘玄冠夫子不以弔

疏曰養疾者朝服羔裘玄冠即朝服也始死則去朝服著深衣時有不易者又有小斂後羔裘弔者記者因引孔子行禮之事言之

馬氏曰弔者在小斂之前猶當服羔裘玄冠以主人

未成服弔者麻經不敢先也故子游裼裘而弔既小斂乃襲裘帶經而入若夫子羔裘玄冠不以弔者是言小斂之後而已矣

子游問喪具夫子曰稱家之有無子游曰有無惡乎齊夫子曰有毋過禮苟亡矣斂首足形還葬縣棺而封人豈有非之者哉

喪具送終之儀物也惡乎齊言何以爲厚薄之劑量也毋過禮不可以富而踰禮厚葬也還葬謂斂畢即葬不殯而待月日之期也縣棺而封謂以守縣繩而

下之不設碑綽也人不非之者以無財則不可備禮

也

馬氏曰孟子曰不得不可以爲悅無財不可以爲悅古之人所以得用其禮者爲其有財故也苟無

其財則斂首足形還葬雖不足爲孝子之悅然以其所以葬而葬亦豈有非之者哉

司士賁告於子游曰請襲於牀子游曰諾縣子聞之曰汰哉叔氏專以禮許人

賁司士之名也禮始死廢牀而置尸於地及復而不生則尸復登牀襲者斂之以衣也沐浴之後商祝襲祭服祿衣蓋布於牀上也飯含之後遷尸於襲上而

衣之襲於牀者禮也後世禮失而襲於地則褻矣司
士知禮而請於子游子游不稱禮而答之以諾所以
起縣子之譏也汰矜大也言凡有諮問禮事者當據
禮答之子游專輒許諾則如禮自己出矣是自矜大
也叔氏子游字

宋襄公葬其夫人醯醢百甕曾子曰既曰明器矣而又
實之

夏禮專用明器而實其半虛其半殷人全用祭器亦

實其半周人兼用二器則實人器而虛鬼器

馬氏曰既葬禮

言陳明器亦有黍稷醢醢酒醴以實之宋襄公之葬夫人醢醢百甕蓋譏其多於禮可也以為明器而不當實之則非矣由是觀之豈曾子言殷人之禮有祭器而不必實明器也歟

孟獻子之喪司徒旅歸四布夫子曰可也

疏曰送終既畢賻布有餘其家臣司徒承主人之意使旅下士歸還四方賻主人之泉布時人皆貪而獻子家獨能如此故夫子曰可也善其能廉左傳叔孫氏之司馬馮戾是家臣亦有司徒司馬也

長樂陳氏曰知死者

贈知生者賻賻之餘君子不可利於已亦不可歸
於人利於已則啓天下家喪之心歸於人則絕
天下恤喪之禮與其利於已寧歸於人與其歸於人
寧班諸兄弟之貧者孟獻子之喪司徒旅歸四布孔
子可之以其賢乎已者而已
不若班諸貧者為盡善也

讀賻曾子曰非古也是再告也

車馬曰賻賻所以助主人之送葬也既受則書其人
名與其物於方板葬時柩將行主人之史請讀此方
版所書之賻蓋於柩東西面而讀之古者奠之而不
讀周則既奠而又讀焉故曾子以為再告也

臨川吳氏曰按

欽定四庫全書

卷三

士喪禮下篇祖奠畢公賵賓賵其時賵者已致命於
柩凡所賵之物書之於方及次日遣奠畢苞牲行器
之後主人之史讀賵若欲神一一知之前既致命今
又讀之是再告於神也蓋古者但有賵時致命之禮
無後來再讀之禮
故曾子以爲非古

成子高寢疾慶遺入請曰子之病革矣如至乎大病則
如之何

成子高齊大夫國伯高父諡成也遺慶封之族革與
亟同急也大病死也諱之之辭

子高曰吾聞之也生有益於人死不害於人吾縱生無

益於人吾可以死害於人乎哉我死則擇不食之地而葬我焉

不食之地謂不耕墾之土

嚴陵方氏曰子高之愛人可知矣觀公叔文子樂瑕

邱而欲葬則子高之所得不亦多乎○臨川吳氏曰入請入卧内而請問其遺命也大病謂死不食之地謂地不可以種五穀以供民食者子高自謂生而不能利澤於人是無益於人也若死而葬人所謂耕墾之地以妨五穀是有害於人矣故欲擇不可墾耕之地而葬焉其意慷慨不自足其言依於謙儉蓋亦可謂

賢已

子夏問諸夫子曰居君之母與妻之喪居處言語飲食

衍爾

君母君妻雖皆小君皆服齊衰不杖期然恩義則淺矣故居其喪則自處如此衍爾和適之貌此章以文勢推之喪下當有如何夫子曰字舊說謂記者之略亦或闕文歟又否則問當作聞

賓客至無所館夫子曰生於我乎館死於我乎殯

生既館之死則當殯。應氏曰朋友以義合謂之賓客者以自遠方而來也

國子高曰葬也者藏也藏也者欲人之弗得見也是故衣足以飾身棺周於衣槨周於棺土周於槨反壤樹之哉

國子高即成子高也。疏曰子高之意人死可惡故備飾以衣衾棺槨欲其深邃不使人知今乃反更封

壤為墳而種樹以標之哉國子意在於儉非周禮

馬氏

曰古之人尤畧於死者衣之以薪葬諸中野而後世聖人特嚴慎終之禮故瓦棺聖周易之以棺槨棺槨為不足被之以柳翣易之以棺槨者言無使土侵膚被之以柳翣者言無使人惡於死凡此皆藏之弗得

見者也周官冢人周爵等為之立封之度與其樹數故觀其封則知位秩之高下觀其樹則知命數之多寡所以遺後世子孫之識非以為觀美者也封之崇四尺孔子之所不廢而國子高非之亦異於禮矣

孔子之喪有自燕來觀者舍於子夏氏子夏曰聖人之葬人與人之葬聖人也子何觀焉

延陵季子之葬其子夫子尚往觀之今孔子之葬燕人來觀亦其宜也然子夏之意以為聖人葬人則事皆合禮人之葬聖人則未必皆合於禮也故語之曰子以為聖人之葬人乎乃人之葬聖人也又何觀焉

蓋謙辭也

長樂陳氏曰君子之於喪禮尤衆人之所欲觀者也故子思之喪母滕世子之葬定

公四方猶且觀之況聖人之門人葬聖人乎此燕人所以來觀之

昔者夫子言之曰吾見封之若堂者矣見若坊者矣見若覆夏屋者矣見若斧者矣從若斧者焉馬鬣封之謂也今一日而三斬板而已封尚行夫子之志乎哉

此言封土有此四者之形封築土為墳也若堂者如堂之基四方而高也坊堤也若坊者上平旁殺而南北長也若覆夏屋者旁廣而卑也若斧者上狹如刃

較之上三者皆用功力多而難成此則儉而易就故俗謂之馬鬣封馬鬣鬣之上其肉薄封形似之也今一日者謂今封築孔子之墳不假多時一日之間三次斬板即封畢而已止矣其法側板於坎之兩旁而用繩以約板乃內土於內而築之土與板平則斬繼約板之繩而升此板於所築土之上又實土於中而築之如此者三而墳成矣故云三斬板而已封也尚庶幾也乎哉疑辭亦謙不敢質言也

長樂陳氏曰孔子以時人之封

過泰也故欲從其殺者而已門人以夫子之志於儉也故一日三斬板以行夫子之志而已門人於封則儉於披崇練旆則不儉者儉則行夫子之志不儉則行門人之志行夫子之志所以救時行門人之志所以尊師也

婦人不葛帶

禮婦人之帶牡麻結本卒哭丈夫去麻帶服葛帶而首絰不變婦人以葛為首絰以易去首之麻絰而麻帶不變所謂不葛帶也既練則男子除絰婦人除帶婦人輕首重要故也然此謂婦人居齊斬之服者如

此若大功以下輕者至卒哭則並變為葛與男子同
有薦新如朔奠

朔奠者月朔之奠也未葬之時大夫以上朔望皆有
奠士則朔而已如得時新之味或五穀新熟而薦之

則其禮亦如朔奠之儀也

金華應氏曰薦新重時物也薦新於廟死者已遠則

感傷或淺薦新於殯其痛尚新則感傷必重朔祭謂之大奠其禮視大斂故薦新亦如之謂男女各即位
內外各從事而奠哭之儀如一也

既葬各以其服除

三月而葬葬而虞虞而卒哭親重而當變麻衰者變之其當除者即自除之不俟主人卒哭之變也

池視重雷

疏曰池者柳車之池也重雷者屋之重雷也以木為之承於屋簷水溜入此木中又從木中而雷於地故云重雷也天子之屋四注四面皆有重雷諸侯四注而重雷去後大夫惟前後二士惟一在前生時屋有重雷故死時柳車亦象宮室而設池於車覆鼈甲之

下牆帷之上蓋織竹為之形如籠衣以青布以承鼈甲名之曰池以象重雷也方面之數各視生時重雷君即位而為禭歲一漆之藏焉

疏曰君諸侯也人君無論少長體尊物備即位即造為親尸之棺蓋柩棺也漆之堅強甓甓然故名禭每年一漆示如未成也藏焉者其中不欲空虛如急有待故藏物於中一說不欲令人見故藏之

嚴陵方氏曰禭即所

謂親也君尊雖凶禮亦備豫焉

復揆齒綴足飯設飾帷堂並作

始死招魂之後用角柶柱尸之齒令開得飯含時不
閉又用燕几拘綴尸之兩足令直使著屨時不辟戾
也飯者實米與貝于尸口中也設飾尸襲斂也帷堂
堂上設帷也作起為也復至帷堂六事一時並起故

云並作也儀禮亦總見一圖

山陰陸氏曰言復揆齒綴足飯設飾此五事並

作於帷
堂之時

父兄命赴者

疏曰生時與他人有恩識者今死則其家宜使人往相赴告士喪禮孝子自命赴者若大夫以上則父兄命之也

君復於小寢大寢小祖大祖庫門四郊

天子之郭門曰臯門明堂位言魯之庫門即天子臯門是庫門者郭門也。疏君王侯也前曰廟後曰寢室有東西廂曰廟無東西廂有室曰寢小寢者高祖以下寢也王侯同大寢天子始祖之寢諸侯太祖之

寢也小祖者高祖以下廟也王侯同太祖者天子始
祖之廟諸侯太祖之廟也。馬氏曰寢所居處之地
祖有所事之地門所出入之地郊所嘗至之地君復
必於此者蓋魂氣之往亦未離生時熟習之地也觀
此則死生之說可知矣。今按馬氏以小寢大寢為
燕寢正寢與舊說異

喪不剝奠也與祭肉也與

剝者不巾覆也脯醢之奠不惡塵埃故可無巾覆凡

覆之者必其有祭肉者也

廬陵胡氏曰牲肉不巾則塵蠅汚之

既殯旬而布材與明器

材為槨之木也布者分列而暴乾之也殯後旬日即治此事禮獻材于殯門外註云明器之材此云材與明器者蓋二者之材皆乾之也

朝奠日出夕奠逮日

逮日及日之未落也。方氏曰朝奠以象朝時之食夕奠以象夕時之食孝子事死如事生也

父母之喪哭無時使必知其反也

未殯哭不絕聲殯後雖有朝夕哭之事然廬中思憶則哭小祥後哀至則哭此皆哭無時也使者受君之任使也小祥之後君有事使之不得不行然反必祭告俾親之神靈知其已反亦出必告反必面之義也

練練衣黃裏緇緣

疏曰練小祥也小祥而著練冠練中衣故曰練也練衣者以練為中衣黃裏者黃為中衣裏也正服不可

變中衣非正服但承衰而已縗淺絳色緣謂中衣領及衰之緣也

葛要經繩屨無紃

小祥男子去首之麻經惟餘要葛也故曰葛要經繩屨者父母初喪菅屨卒哭受齊衰蒯蕪屨小祥受大功繩麻屨也無紃謂無屨頭飾也。朱子曰菅屨疏屨今不可考今略以輕重推之斬衰用今草鞋齊衰用麻鞋可也麻鞋今卒伍所著者

角瑱

瑱充耳也吉時君大夫士皆有之所以掩於耳君用玉爲之初喪去飾故無瑱小祥後微飾故用角爲之也

馬氏曰哀痛至甚則耳無聞目無見也而哀殺則能有聞矣故又為角瑱以充之

鹿裘衡長祛祛裼之可也

疏曰冬時吉凶衣裏皆有裘吉則貴賤有異喪則同用鹿皮為之小祥之前裘狹而短袂又無祛小祥稍飾則更易作橫廣大者又長之又設其祛也裼者裘

上之衣吉時皆有喪後凶質未有裼衣小祥後漸向吉故加裼可也按如此文明小祥時外有衰衰內有練中衣中衣內有裼衣裼衣內有鹿裘鹿裘內自有常著襦衣。今按祛者袖口也此所謂祛則是以他物為袖口之緣既祛以為飾故裼之可也

嚴陵方氏曰鹿裘以

白鹿之皮為裘也凡此所以為易除之漸而已

有殯聞遠兄弟之喪雖總必往非兄弟雖鄰不往

三年之喪在殯不得出弔然於兄弟則恩義存焉故

雖總服兄弟之異居而遠者亦當往哭其喪若非兄

弟則雖近不往

嚴陵方氏曰總最服之輕者服之輕者服之輕猶必往況其重者乎蓋同

姓之恩不得不為之隆故也鄰最居之近者居之近猶不往況其遠者乎蓋異姓之恩不得不為之殺故也

所識其兄弟不同居者皆弔

馮氏曰上二句既主生者出弔往哭為義則下一句

文意當同所識當為句若所知之謂也死者既吾之所知識則其兄弟雖與死者不同居我皆當弔之所

以成往來之情義也

天子之棺四重水兕革棺被之其厚三寸槨棺一梓棺
二四者皆周

水牛兕牛之革耐濕故以為親身之棺二革合被為
一重槨木亦耐濕故次於革即前章所謂裨也梓木
棺二一為屬一為大棺槨棺之外有屬棺屬棺之外
又有大棺四者皆周言四重之棺上下四方悉周帀
也帷槨不周下有茵上有抗席故也

棺束縮二衡三衽每束一

古者棺不用釘惟以皮條直束之二道橫束之三道衽形如今之銀則子兩端大而中小漢時呼為小要不言何物爲之其亦木乎衣之縫合處曰衽以小要連合棺與蓋之際故亦名衽先鑿木置衽然後束以皮每束處必用一衽故云衽每束一也

柏槨以端長六尺

天子以柏木為槨端猶頭也用柏木之頭為之其長

六尺

天子之哭諸侯也爵弁經紒衣

諸侯薨而赴於天子天子哭之爵弁紒衣本土之祭服爵弁弁之色如爵也紒衣絲衣也。鄭氏曰經衍字也周禮王弔諸侯弁經總衰。疏曰天子至尊不見尸柩不弔服此遙哭之故不服總衰而服爵弁紒衣也

或曰使有司哭之

鄭氏曰非也哀戚之事不可虛

廬陵胡氏曰諸侯薨在國天子遣哭之不

親見尸柩故不服總衰弔而服士之祭服有司哭之非也惡夫涕之無從況使人乎

爲之不以樂食

疏曰此是記者之言非或人之說也

天子之殯也最塗龍輅以梓加斧于梓上畢塗屋天子之禮也

疏曰最叢也最塗謂用木叢棺而四面塗之也龍輅殯時用輅車載柩而畫轅為龍也以梓者此叢木象

槨之形也繡覆棺之衣為斧文先叢四面為槨使上與棺齊而上猶開以此棺衣從槨上入覆於棺故云加斧于槨上也畢盡也斧覆既竟又四注為屋以覆於上而下四面盡塗之也。今按叢塗龍輅是輅車亦在殯中非脫去輅車而殯棺也唯天子之喪有別姓而哭

諸侯朝覲天子爵同則其位同今喪禮則分別同姓異姓庶姓使各相從而為位以哭也

魯哀公誄孔丘曰天不遺耆老莫相予位焉嗚呼哀哉
尼父

作謚者先列其生之實行謂之誄大聖之行豈容盡
列但言天不留此老成而無有佐我之位者以寓其
傷悼之意而已耳稱孔丘者君臣之辭此與左傳之

言不同○鄭氏曰尼父因其字以為之謚也

山陰陸氏曰據

此左傳所錄公誄之曰旻天不弔不憇遺一老俾屏
余一人以在位不修春秋之辭也今記修之如此

國亡大縣邑公卿大夫士皆厭冠哭於太廟三日君不

舉或曰君舉而哭於后土

厭冠喪冠也說見曲禮盛饌而以樂侑食曰舉后土社也。應氏曰哭於大廟者傷祖宗基業之虧損哭於后土者傷土地封疆之朘削也不舉自貶損也曰君舉者非也

孔子惡野哭者

所知吾哭諸野夫子嘗言之矣蓋哭其所知必設位而帷之以成禮此所惡者或郊野之際道路之間哭

非其地又且倉卒行之使人疑駭故惡之也方氏說哭者呼減子臯曰野哉孔子惡者以此恐未然

未仕者不敢稅人如稅人則以父兄之命

稅人以物遺人也未仕者身未尊顯故內則不可專家財外則不可私恩惠也或有情義之所不得已而當遺者則稱尊者之命而行之

嚴陵方氏曰未仕者則無祿故不敢稅人

其或禮有所不可廢義有所不可免則以父兄之命而已

士備入而後朝夕踊

國君之喪諸臣有朝夕哭踊之禮哭雖依次居位踊必相視為節不容有先後也士卑其入恒後士皆入則無不在者矣故舉士入為畢而後踊焉

祥而縞是月禫徙月樂

疏曰祥大祥也縞謂縞冠大祥日著之。○馬氏曰祥禫之制施於三年之喪則其月同施於期之喪則其月異雜記曰十一月而練十二月而祥十五日而禫此期之喪也父在為母有所屈三年所以為極而至

於二十五月者其禮不可過以三年之愛而斷於期者其情猶可伸在禪月而樂者聽於人也在徙月而

樂者作於已也

嚴陵方氏曰祥而縞即玉藻所謂縞冠素紕既祥之冠是也是月禪徙月

樂者謂人朝祥而暮歌孔子以謂踰月則其善者以此

君於士有賜幣

幣幕之小者置之殯上以承塵也大夫以上則有司供之士卑又不得自爲故君於士之殯以幣賜之也

禮記大全卷三